

KABAR BAIK NANG DI MARKUS NYAMPEATN

MARKUS

PANGANTAR

Buku Kabar Baik Markus nian di mulai' man pernyataan, “Nianlah Kabar Baik tentang Yesus Karistus Anak Allah.” Dalapm Kabar Baik koa Yesus di nampilatn saurakng nang bawibawa ka' dalapm tindakan-Nya. Wibawa-Nya nyata ka' cara Ia ngajar, dalapm kuasa-Nya ka' roh-roh jahat, man dalapm Ia ngamponi' dosa. Yesus nampilatn diri'-Nya jaji Anak Manunsia nang mare'atn nyawa-Nya biar manunsia di bebasatn dari dosa. Gesah tentang Yesus ka' dalapm buku nian di nyampeatn secara nyata man ina' babumutn-bumutn. Ahe nang Nya manjawat labih manyak di tingkitatn daripada pakataatn man ajaran-Nya. Laka' kata-kata pamula'atn nang ponok tentang Yohanes Pamaptis man tentang baptisan Yesus sarata cobaan ka' diri'-Nya, buku Markus nian langsung ngesahatn palayanan Yesus, kususnya tentang kasambuhan-kasambuhan nang di-Nya manjawat man tentang pangajaran-Nya. Pasal-pasal pangabisatn muat gesah tentang ahe nang jaji ka' minggu pangabisatn dalapm idup Tuhan Yesus ka' ai' tanah nian, tarutama tentang Ia di nyalip man Ia mulakng idup dari kamatiatn.

*INJIL***MARKUS****Yohanes Pamaptis**

1 Nianlah pamula'atn Kabar Baik tentang Yesus Karistus, Anak Allah. ²Lea nang taconteng ka' dalapm kitap nabi Yesaya,

“Tele'lah, Aku nyuruh utusan-Ku nyintolo'i' Kao, ia nyiapatnna' maraga untu'-Nya;

³ada suara urakng nang ngampakatn ka' padang paser, siapatn maraga untu' Tuhan, parata maraga untu'-Nya.”

⁴Lekoalah Yohanes Pamaptis tampil ka' padang paser man ngampakatn, “Barantilah babuat dosa man bare'lah diri'nyu dibaptis man Allah ngamponia' tabiatnyu nang jahat.” ⁵Lalu ataknglah urakng-urakng dari da'erah Yudea man samua panduduk Yerusalem ka' ia, man sambil ngako' dosanya. Ia ka' koa dibaptis ka' sunge Yordan. ⁶Yohanes make jubah bulu onta man ikat pingakng kulit, man makanannya buntak man madu udas. ⁷Nianlah nang nya ngesahatn, “Laka' aku nian, atakngnga' Ia nang labih bakuasa daripada aku; ngogo' muka' tali sapatu-Nya pun aku ina' pantas. ⁸Aku maptis kita' man ai', tapi Ia maptisa' kita' man Roh Kudus Allah.”

Yohanes maptis Yesus

(Mat. 3:13-17; Luk. 3:21-22; Yoh. 1:32-34)

⁹Ka' wa'tu koa ataknglah Yesus mpat ka' Nasaret ka' tanah Galilea, Ia di Yohanes maptis ka' sunge Yordan. ¹⁰Taka' Yesus kaluas dari dalapm ai', Ia nele' langit tabuka', man Roh Kudus lea burukng dara turutn ka' atas-Nya. ¹¹Lalu kadangngaratnlah suara Allah ampat ka' saruga, “Kao Anak-Ku nang Ku ngasihi', kao nang marepo ati-Ku.”

Yesus di Ibalis nyobai'

(Mat. 4:1-11; Luk. 4:1-13)

¹²Laka' koa Roh Kudus mimpin Yesus ka' padang paser. ¹³Ka' padang paser koa Yesus badiapm ampat puluh ari lamanya, Ibalis pamimpin setan-setan barusaha nyobai' Ia. Yesus ka' naun ka' antara laok-laok siga' man malaekat-malaekat ngalayani' Yesus.

Yesus mulai' palayanan-Nya ka' Galilea

(Mat. 4:12-17; Luk. 4:14-15)

¹⁴Laka' Yohanes dinangkap ataknglah Yesus ka' Galilea ngesahatn Kabar Baik dari Allah ka' naun, ¹⁵Kata-Nya, “Wa'tu nang di Allah nantuatn dah sampe; Allah marentah jaji Raja dah samak. Batobatlah man Pucaya'lah ka' Kabar Baik nang dari Allah!”

Yesus nyaru' murid-murit nang pamula'atn

(Mat. 4:18-22; Luk. 5:1-11)

¹⁶Taka' Yesus tagah bajalatn ka' tapi dano Galilea, Ia nele' Simon nyamadi' Andreas. Ia ka' koa tagah nganjala ikatn ka' dano, jukut ia ka' koa pangago' ikatn. ¹⁷Yesus bakata ka' ia ka' koa, “Inje', tuna'anlah Aku, man kita' Ku ajaria' ngago' urakng jaji pangikut-Ku lea kita' ngago' ikatn.” ¹⁸Lalu ia ka' koa da' ningalatn jalanya man nuna'an Yesus. ¹⁹Man laka' Yesus ngalanjutatn pajalanannya agi', Ia nele' Yakobus nyamadi' Yohanes, kaduanya anak Sebedeus, tagah ngamasatn jala ka' dalapm parahu. ²⁰Yesus nyaru' ia ka' koa man ia ka' koa pun ningalatn apa'nya, Sebedeus, ka' dalapm parahu man anak buahnya lalu nuna'an Yesus.

Yesus ka' rumah tempat sumbayang ka' Kapernaum

(Luk. 4:31-37)

²¹Ia ka' koa namus ka' Kapernaum. Ka' ari Sabat mulai' Yesus tama' ka' dalapm rumah tempat sumbayang, di'koa ia mulai' ngajar. ²²Samua urakng nang nangngaratn ajaran-Nya taheran-heran, jukut ia ngajar urakng-urakng ka' koa man kuasa. Ajaran-Nya ina' lea ajaran guru-guru agama Yahudi. ²³Ka' wa'tu koa ka' dalapm rumah tempat sumbayang koa ada saurakng nang katamaan roh jahat. Urakng koa ngampak, ²⁴“O, Yesus urakng Nasaret? Ahe urusan Kita' man kami, Kita' atakng untu' ngancuratnna' kami? Aku nau'an sae Kita', nang Kudus mpat ka'

Allah.”²⁵ Tapi Yesus nagurnya, kata-Nya, “Diapm, kaluarlah dari urakng nian!”²⁶ Roh jahat koa ngagar tubuh urakng koa, lalu kaluar dari tubuhnya sambil ngampak nyarikng.²⁷ Samua urakng sidi heran, sampe-sampe ia ka' koa bakata seko' ka' nang lainnya, “Gajah! Luar biasa! Nian ajaran baru. Urakng nian ngampu' kuasa sampe-sampe roh jahat pun nurut ka' Ia.”²⁸ Lalu kabar tentang Yesus sidi ganceh kadangngaratn ka' maea' ma'an ka' sigana binua Galilea.

Yesus nyamuhatn datu' Simon nangbini man urakng-urakng lain

(Mat. 8:14-17; Luk. 4:38-41)

²⁹Laka' Yesus kaluar dari rumah tempat sumbayang koa, Ia man Yakobus man Yohanes ampus ka' rumah Simon man Andreas.³⁰ Datu' Simon nangbini tagah sakit tabitn man gurikng ka' tempat tidurnya. Jaji wa'tu Yesus man murit-murit-Nya tama' ka' rumah koa, Yesus di dimadahi tentang hal koa.³¹ Lalu Yesus notoknya man nyingi'i' kokotnya, lalu manto' ia duduk. Taka' koa uga' tabitnnya samuh. Lalu datu' Simon nangbini koa lumpat man nipara ia ka' koa.³² Gumare' arinya taka' mata ari dah tingalpm, urakng-urakng ka' kota koa ngincakng ka' Yesus samua urakng nang sakit man katama'an setan.³³ Amper samua panduduk kota Kapernaum bakomo' ka' depan rumah Simon man Andreas.³⁴ Lalu Yesus nyamuhatn macam-macam panyakit man ngoser setan-setan nang nguasai'

rami urakng. Ia mai'an setan-setan koa untu' ngomong, barang setan-setan ka' koa nau'an sae Ia.

Yesus ngajar ka' kota-kota lain

(Luk. 4:42-44)

³⁵ Taka' dinihari, Yesus lumpat ampus ka' luar. Ia ampus ka' tempat nang sunyi' lalu bado'a di' koa. ³⁶ Wa'tu Petrus man ayungannya nele' kade' Yesus ina' ka' rumah, ia ka' koa ampus ngago'i'-Nya. ³⁷ Taka' batamu man Ia, ia ka' koa bakata, “Samua urakng ngago'i' Kita'.” ³⁸ Sahut-Nya, “Inje'lah diri' ampus ka' kota lain, ka' kota-kota nang basamaktn, biar ka' naun uga' Aku ngesahatn Kabar Baik dari Allah, barang untu' koa lah Aku dah atakng.” ³⁹ Lalu ampuslah Ia ka' saluruh Galilea man ngesahatn Kabar Baik ka' dalapm rumah-rumah tempat sumbayangnya ka' koa man ngoser setan-setan.

Yesus nyamuhatn saurakng nang bapanyakit kulit dibangkakng

(Mat. 8:1-4; Luk. 5:12-16)

⁴⁰ Saurakng nang bapanyakit kulit dibangkakng, atakng ka' Yesus sambil balutut ia bapinta' jakatanya, “Kade' Kita' mao', Kita' baya nyamuhatn aku.” ⁴¹ Yesus sidi kasihatn ka' urakng koa. Ia pun nyangkamnya sambil bakata, “Aku mao', Samuhlah!” ⁴² Sakajap koa uga' lanyaplah panyakit kulit urakng koa, man ia jaji samuh. ⁴³ Lalu Yesus nyuruh urakng koa

ningalatn tempat koa sambil mai'annya sisi-sidi jakata-Nya, ⁴⁴“Dangngar boh, sisi ame kao padahatn ahe-ahe tentang hal nian ka' saea' ma'an, tapi ampuslah, tele'atn diri'nyu ka' imam man bare'lah pasembahan ka' Allah sasuai man parentah Musa tentang urakng nang dah samuh dari panyakit kulit, man hal koa jaji bukti kade' kao dah banar-banar samuh.” ⁴⁵ Tapi urakng koa ampus ngesahatn kajadian koa ka' maea' ma'an, sampe-sampe Yesus ina' baya agi' tarang-tarangan tama' ka' dalapm kota. Ia badiapm ka' luar ka' tempat nang sunyi'; tapi urakng tarus ja' atakng ka' Ia dari maea' ma'an.

Yesus nyamuhatn urakng elat

(Mat. 9:1-8; Luk. 5:17-26)

2 Dah lewat sangahe ari, Yesus mulakng agi' ka' Kapernaum, kadangngaratnlah kabar ka' maea' ma'an, kade' Ia ada ka' rumah. ² Lalu rami urakng atakng bakomo'-komo' sampe ina' ada agi' tempat, bahkan ka' pamobok pun dah ina' muat. Samintara Ia nyampeatn Pakataatn Allah ka' ia ka' koa, ³ ataknglah basangahe urakng nang ngincakng saurakng nanglaki nang elat nang di ampat urakng nangkon make tandu. ⁴ Tapi ia ka' koa ina' baya ngincakngnya ka' Yesus barang urakng rami di'koa, lalu ia ka' koa mongkar atap nang ka' atas Yesus; dah tabuka' atap koa ia ka' koa nuruntatn urakng elat koa man tandu tempatnya gurikng. ⁵ Taka' Yesus nele' kapucaya'atn nya ka' koa, bakatalah Ia ka' urakng nang elat koa, “O anak-Ku, dosanyu dah diamponi” ⁶ Tapi di'koa ada uga' duduk sangahe

urakng guru agama Yahudi, ia ka' koa bakata ka' dalapm atinya,
⁷“Ngahe urakng nian bakata lea koa? Ia ngina Allah. Sae nang
 baya ngamponi' dosa talino kade' buke' Allah babaro?”⁸ Tapi
 wa'tu koa uga' Yesus nau'an pikiran nya ka' koa. Lalu Ia bakata,
 “Ngahe kita' batanya'-tanya' lea koa ka' dalapm ati kita'?”⁹ Mae
 nang labih mudah Aku bakata ka' urakng elat nian, dosanyu dah
 diamponi', ato ke' ngataatn, lumpatlah, angkatlah tikarnyu man
 bajalatnlah¹⁰ Tapi biar kita' nau'an, kade' ka' dunia nian Anak
 Manunsia bakuasa ngamponi' tabiat nang jahat.” Bakatalah Ia
 ka' urakng nang elat koa,¹¹ “Lumpatlah, angkat tikarnyu man
 pulaknglah ka' rumahnyu!”¹² Lalu urakng elat koa badiri, naap
 tikarnya man bajalatn kaluar. Samua urakng di'koa nele' hal koa
 marasa heran. Ia ka' koa muji Allah man bakata, “Gi' ina' suah
 diri' nele' hal lea nian.”

Lewi panagih pajak nuna'an Yesus

(Mat. 9:9-13; Luk. 5:27-32)

¹³Laka' koa Yesus ampus agi' ka' tapi dano Galilea, man
 sigana urakng rami atakng ka' Yesus, lalu Yesus ngajar ia
 ka' koa.¹⁴ Samintara Yesus bajalatn di'koa, Ia nele' saurakng
 panagih pajak badama Lewi, anak Alpeus, tagah duduk ka'
 kantor pajak. “Tuna'anlah Aku,” kata Yesus ka' ia. Lalu Lewi
 badiri man nuna'an Yesus.¹⁵ Wa'tu Yesus tagah makatn ka'
 rumah Lewi, ataknglah rami panagih pajak man urakng-urakng
 nang badosa ikut uga' makatn sama-sama man Yesus man
 murit-murit-Nya. Tagal rami urakng nang nuna'an Yesus.

¹⁶ Wa'tu guru-guru agama dari golongan Parisi nele', kade' Yesus makatn man panagih pajak man urakng-urakng badosa koa, bakatalah ia ka' koa ka' murid-murit-Nya, “Ngahe Ia makatn barage man panagih pajak man urakng-urakng nang badosa?”

¹⁷ Yesus nangngar pakataatnnya ka' koa lalu nyahut, “Buke' urakng ringakng nang malaluatn mantari, tapi urakng sakit; Aku atakng buke' untu' nyaru' urakng banar, tapi urakng nang badosa.”

Hal tentang bapuaasa

(Mat. 9:14-17; Luk. 5:33-39)

¹⁸ Ka' sote' ari, taka' murid-murit Yohanes man murid-murit urakng Parisi tagah bapuaasa, ataknglah urakng-urakng man bakata ka' Yesus, “Ngahe murid-murit Yohanes man murid-murit urakng Parisi bapuaasa, tapi murid-murit Kita' ina'?” ¹⁹ Sahut Yesus, “Aku man murid-murit-Ku lea panganten nang laki man ayukng-ayukngnya, ka' gawe panganten. Ka' gawe panganten ahe ke', ayukng-ayunkng nyu bapuasaa' kade' panganten nang laki gi' sama-sama man ia ka' koa? pasti ina'” ²⁰ Tapi atakngnga' wa'tunya panganten nang laki koa di taapa' dari ia ka' koa, man ka' wa'tu koalah ia ka' koa bapuasaa'. ²¹ Nana' ada urakng nang nambal kaen bonto' man kaen nang baharu. Tagal kaen panambal koa susuta' man ngojek baju koa, lalu sia' aya'a' kojek baju koa. ²² Lea koa uga' ina' saurakngpun nginsi'atn anggur nang baharu ka' dalapm kantong kulit nang tuha, tagal kade' lea koa anggur koa ngojekatnna' kantong koa, sampe-sampe

anggur koa man kantongnya dua-duanya tabuakng. Anggur nang baharu aruslah di isi'atn ka' dalapm kantong nang baharu uga'."

Murit-murit mebet gandum ka' ari Sabat

(Mat. 12:1-8; Luk. 6:1-5)

²³ Ka' sote' ari Sabat, taka' Yesus bajalatn ngalintasi' uma gandum, murit-murit-Nya mulai' mebet bege' gandum. ²⁴ Lalu urakng-urakng Parisi bakata ka' Yesus, "Tele'! Ngahe ia ka' koa ngalanggar aturan nang ina' baya dipanjawat ka' ari Sabat?" ²⁵ Sahut Yesus, "Ina' suah ke' kita' maca ahe nang di Daut manjawat, taka' ia man urakng-urakng nang nuna'annya kakurangan makanan man kaparatn, ²⁶ Daut tama' ka' dalapm Rumah Allah wa'tu Abyatar manjabat jaji imam Agung lalu ia makatnni' roti nang di remahan ka' Allah nang ina' mulih dimakatn kacoali di imam-imam ihan tapi Daut mare'atnya uga' ka' pangikut-pangikutnya?" ²⁷ Lalu kata Yesus agi', "Aturan ari Sabat dimuat untu' manto' talino, buke' aturan ari sabat nang ngatur talino. ²⁸ Jaji Anak Manunsia koa bakuasa natapatn ahe nang mulih man nang ina' mulih ka' ari Sabat."

Yesus nyambuhatn urakng ka' ari Sabat

(Mat. 12:9-14; Luk. 6:6-11)

3 Lalu Yesus tama' agi' ka' rumah tempat sumbayang. Di' koa ada saurakng nang mati sabalah kokotnya. ² Basangahe

urakng Yahudi maratiatnni' Yesus, kade' Yesus nyamuhatnna' urakng koa ka' ari Sabat, biar ia ka' koa baya nyalahatn Yesus. ³ Kata Yesus ka' urakng nang mati sabalah kokotnya koa, “Keatn, badirilah ka' tengah!” ⁴ Lalu Ia batanya' ka' urakng-urakng nang ada di'koa, “Manurut ukum Torat, diri' mulih manjawat ahe ka' ari Sabat? Babuat baik ato babuat jahat? Nyalamatn urakng ato munuhnya?” tapi ia ka' koa badiapm ma'an. ⁵ Man parasaan bera Yesus nele' urakng-urakng ka' sakulilikng-Nya, tapi Ia kasal ati uga', tagal ia ka' koa sisi miah karas kapala. Lalu Ia bakata ka' urakng koa, “Jolo'atn kokotnyu.” Urakng koa nyolo'atn kokotnya, man kokotnya koa pun jaji samuh. ⁶ Jaji kaluarlah urakng-urakng Parisi dari rumah tempat sumbayang koa lalu baganceh-ganceh bahaupm man sangahe urakng pandukung Herodian, untu' munuh Yesus.

Yesus nyamuhatn rami urakng

⁷ Lalu Yesus man murid-murid-Nya ningalatn tempat koa, ampus ka' Dano Galilea. Rami urakng dari propinsi Galilea, Yudea, ⁸ dari Yerusalem, Idumea, dari sabarang Yordan, man dari da'erah Tirus man Sidon nuna'an-Nya. Ia ka' koa atakng ka' Yesus tagal ia ka' koa nangngar tentang hal-hal nang dah di-Nya manjawat. ⁹ Ia nyuruh murid-murid-Nya nyiapatn sabuah parahu untu'-Nya, biar Ia ame sampe kana pesetatn di' urakng rami ka' di'koa. ¹⁰ Tagal Ia dah nyamuhatn rami urakng, sampe samua nang basakitn bapeset-peset barusaha nyamaki' Yesus biar baya nyangkam-Nya. ¹¹ Man urakng-urakng nang katamaan roh jahat, kade' tatele' ka' Ia, tarus ja' sujut ka' adapatn-Nya man

ngampak, “Kita'lah Anak Allah!”¹² Tapi Yesus miah mai'an roh-roh jahat koa madahatn sae Ia.

Yesus milih duabalas rasul

(Mat. 10:1-4; Luk. 6:12-16)

¹³Laka' koa Yesus maba urakng-urakng nang di-Nya milih naik ka' atas bukit, urakng-urakng ka' koa pun nuna'an-Nya. ¹⁴Lalu Yesus natapatn dua balas urakng, nang uga' Nya nyabut rasul-rasul untu' nyaratai'-Nya. Ia ngiripm urakng-urakng koa untu' ngesahatn Kabar Baik ¹⁵man Ia mare' ka' ia ka' koa kuasa untu' ngoser setan-setan. ¹⁶Nian lah dama kaduabalas rasul koa, Simon nang Yesus mare' dama Petrus, ¹⁷Yakobus man Yohanes anak Sebedeus, nya dua koa adi' baradi'. Nyamadi' koa Yesus mare' dama uga' Boanerges, nang barati anak guntur, ¹⁸Lalu Andreas, Pilipus, Bartolomeus, Matius, Tomas, Yakobus anak Alpeus, Tadeus, Simon urakng Selot, ¹⁹man Yudas Iskariot, nang ngianati' Ia.

Yesus man Beelsebul

(Mat. 12:22-32; Luk. 11:14-23)

²⁰Lalu Yesus man pangikut-pangikut-Nya tama' ka' sabuah rumah. Tapi urakng rami atakng agi' bakomo', sampe-sampe Yesus man murit-murit-Nya ina' sampat makatn. ²¹Urakng-urakng bakata, “Ia dah gila!” Man taka' page waris-Nya nangngar hal koa, ia ka' koa ampus untu' naap-Nya.

²²Man guru-guru agama Yahudi nang atakng dari Yerusalem bakata, “Ia katama'an Beelsebul! Man kuasa pamimpin setan-setan Ia ngoser setan.” ²³Yesus nyaru' ia ka' koa, lalu bakata ka' ia ka' koa make parumpamaan; “Lea mae Ibalis pamimpin setan-setan baya ngoser setan-setan, ²⁴kade' sote' nagari tapacah-pacah, nagari koa ina' baya batahan, ²⁵man kade' sote' rumah tanga' tapacah-pacah, rumah tanga' koa ina' baya batahan. ²⁶Lea koa uga' lah kade' Ibalis marontak ngalawan diri'nya babaro man kade' ia tabagi-bagi, ia ina' baya batahan, pasti lanyapa'. ²⁷Tapi ina' saurakngpun baya nama'i' rumah urakng nang kuat untu' ngarampas haratanya kade' ina' diikat dolo' urakng kuat koa. Laka' koa, baru'lah ia baya ngarompok rumah koa. ²⁸Aku bakata ka' kita', Sabatolnya samua dosa man hojat ahe pun nang ditalino ngataatn diamponia' ²⁹Tapi kade' urakng ngina Roh Kudus Allah, dosanya ina' baya di amponi'. Tagal hinaan koa lah urakng koa arus nanggong dosanya salama-lamanya.” ³⁰Yesus bakata lea koa tagal ia ka' koa madahatn kade' Ia katamaan roh jahat.

Yesus man kamarkapala-Nya

(Mat. 12:46-50; Luk. 8:19-21)

³¹Lalu ataknglah Maria uwe' Yesus man adi' baradi' Yesus. Samintara ia ka' koa badiri ka' luar, ia ka' koa nyuruh urakng nyaru' Yesus. ³²Wa'tu koa rami urakng nang duduk ngulilikngi' Ia, ia ka' koa bakata ka' Yesus, “Tele', uwe' man adi' baradi' Kita' ada ka' luar, man barusaha namui' Kita'.” ³³Sahut Yesus ka' ia

ka' koa, “Sae uwe'-Ku man sae adi' baradi'-Ku?” ³⁴ Ia nele' ka' urakng-urakng nang duduk ka' sakulilikng-Nya koa man bakata, “Kita' nian lah uwe'-Ku man adi' baradi'-Ku! ³⁵ Urakng-urakng nang manjawat kamao'an Allah, ia ka' koa lah adi' baradi'-Ku nanglaki man nangbini, man uwe'-Ku.”

Parumpamaan urakng nang bahuma

(Mat. 13:1-23; Luk. 8:4-15)

4 Ka' sote' ari Yesus ngajar agi' ka' tapi dano Galilea. Sidi rami urakng atakng ngarumuni' Ia. Tagal koa Ia ampus duduk ka' parahu nang batambat di'koa, man urakng nang rami koa badiriatn ka' tapi dano koa. ² Lalu Yesus ngajar banyak hal ka' Ia ka' koa man make parumpamaan. Lea nianlah Ia ngajar urakng rami koa. ³ “Dangngarlah, ada urakng nang bahuma ampus ngamuratn banih. ⁴ Wa'tu ia ngamuratn banih koa, ada banih nang jantu' ka' tapi maraga, lalu ataknglah burukng man matoki' banih koa sampe abis. ⁵ Sabagian agi' jantu' ka' tanah nang babatu-batu, nang tanahnya sabebet, lalu banih koa pun camak, barang tanahnya koa sabebet. ⁶ Tapi taka' mataari tarabit, layu'lah ia man jaji karikng tagal ina' baurat. ⁷ Sabagian agi' jantu' ka' tengah rompo' baduri, lalu sia' aya'lah rompo' baduri koa ngapet camak banih koa sampe mati, sampe ia ina' babuah. ⁸ Man sabagian agi' jantu' ka' tanah nang gambur, ia bacamak sidi gadok man babuah, asilnya ada nang talu puluh kali lipat, ada nang anam puluh kali lipat, ada nang saratus kali lipat.”

⁹Laka' Yesus ngesahatn parumpamaan koa, Ia bakata, “Kita' batarenyekng, dangngaratnlah!”

¹⁰Taka' Yesus babaro, pangikut-pangikut-Nya man kaduabalas murid-Nya batanya' ka' Ia ahe ratinya parumpamaan koa. ¹¹Sahut-Nya, “Ka' kita' dah dimadahi' rati rahasia lemae Allah marentah jaji Raja, tapi ka' urakng-urakng luar diajar man parumpamaan, ¹²biar

ia ka' koa nele', tapi ina' nau'an ahe nang jadi;

man ia ka' koa nangngar, tapi ina' ngarati,

biar ia ka' koa ame babalik man namu pangamponan.”

¹³Lalu Yesus bakata agi' ka' ia ka' koa, “Ina' ke' kita' ngarati ka' parumpamaan nian? Kade' mpa koa lemae kita' baya ngarati ka' parumpamaan-parumpamaan nang lain? ¹⁴Urakng nang ngamuratn banih koa, urakng nang ngesahatn Kabar Baik. ¹⁵Banah nang jantu' ka' tapi maraga ia koa, urakng-urakng nang nangngar kabar tentang lemae Allah marentah jaji Raja. Tapi Ibalis pamimpin setan-setan atakng ngarampas pakataatn Allah nang baru' di ngamur ka' dalapm atinya koa. ¹⁶Lea koa uga' nang di ngamur ka' tanah nang babatu-batu, koalah urakng-urakng nang nangngar pakataatn Allah koa man atinya langsung karepoatn narima'nya, ¹⁷tapi ia ka' koa ina' baurat man tahan sabantar ihan. Wa'tu ia ka' koa ngalami' kasusahatn ato kana aniaya tagal nuna'an ajaran Kabar Baik koa, ia ka' koa langsung ninggalatn Allah. ¹⁸Banah nang jantu' ka' tengah rompo' baduri koa ibarat urakng-urakng nang nangngar Kabar Baik koa, ¹⁹tapi kuatir ka' kaidupatnnya. Ia ka' koa sidi mao'a' idup bamewah-mewah man ngunyar ahe nang ngarepoatn atinya

ka' koa. Samua kamao'an koa lea rumput nang baduri ngapet Kabar Baik koa sampe-sampe ina' ngasilatn ahe pun ka' dalapm kaidupatnnya ka' koa. ²⁰Man ahirnya nang dingamuratn ka' tanah nang edo', koa lah urakng nang nangngar man nyambuti' Kabar Baik koa lalu babuah, ada nang talu puluh kali lipat, ada nang anam puluh kali lipat, ada nang saratus kali lipat.”

Parumpamaan tentang kulita

(Luk. 8:16-18)

²¹Lalu Yesus bakata ka' ia ka' koa, “Urakng nang ngincakng kulita buke' biar ditampatn ka' babah tapayatn ato ka' babah tempat tidur, tapi di gantungan ka' tapi dinikng. ²²Lea koa uga' ina' ada sote'pun nang dinosokatn nang ina' kateleananna' man ina' ada sote' pun rahasia nang ina' tabungkara'. ²³Sae batarenyekng, dangngaratnlah!”

²⁴Kata Yesus agi', “Pikiri'lah biar kita' ngarati samua ajaran-Ku, tagal lea mae kita' barusaha mao' ngarati ka' ajaran-Ku, lea koa uga'lah Allah nambahatnna' kamampuan ka' kita' untu' labih ngarati agi'. Lea koa uga'lah, Ia nambahatnna' labih banyak agi' pangaratian. ²⁵Saea' ma'an nang nangngaratn pangajaran-Ku, di bare'a' pamahaman labih mayak. Tapi untu' saea' ma'an nang ina' nangngaratn pangajaran-Ku, lea koa uga' sabebet pamahaman nang di nya ngampu' di taapa' uga' dari nya.”

Parumpamaan tentang banih nang tumuh

²⁶Lalu kata Yesus agi', "Lea nian lah hal Karajaan Allah koa, saumpama urakng nang ngamuratn banih ka' tanah. ²⁷Lalu malam ari ia tidur man siakng arinya ia lumpat, samintara banih-banih koa sia' tumuh man jaji aya'. Tapi lea mae caranya banih koa tumuh man jaji aya', urakng koa ina' nau'an. ²⁸Tanah koalah nang ngaluaratn asil, mula-mula tangkenya, bunganya lalu buahnya nang labat. ²⁹Man kade' buah koa dah masak, urakng koa pun mulai' nganyinya, tagal dah sampe musim bahanyi."

Parumpamaan tentang banih sawi

(Mat. 13:31-35; Luk. 13:18-19)

³⁰Kata Yesus agi', "Supaya lebih jelas, Aku nambahatn parumpamaan agi' untu' nojokatn gambaran tentang karajaan Allah. ³¹Karajaan Allah lea bege' sawi nang dingamur ka' tanah. Biarpun bege' sawi koa nang paling enek dari bege' tanaman lain ka' ai' tanah nian. ³²Tapi kade' ditanam bege' sawi koa, tumuh jaji lea puhutn nang paling aya' ka' kabon. Nang ngaluaratnna' dahatn-dahatn nang aya', sampe-sampe burukng-burukng pun baya basarakng man balinukng ka' babahnya."

³³Yesus ngesahatn pakataatn dari Allah ka' ia ka' koa make manyak parumpamaan lea koa, pas man ahe nang baya dinya ka' koa ngarati. ³⁴Yesus gia make parumpamaan kade' ngajar

urakng-urakng koa. Tapi kade' ia man pangikut-pangikut-Nya ihan, Ia nyalasatn samuanya ka' ia ka' koa.

Yesus madiaman nyaru

(Mat. 8:23-27; Luk. 8:22-25)

³⁵ Ka' gumare' ari koa uga' wa'tu mataari dah tingalapm, Yesus bakata ka' pengikut-Nya, “Inje'lah diri' balayar ka' sabarang dano.” ³⁶ Ia ka' koa pun barangkat ninggalatn urakng rami make parahu nang tadi di Yesus make untu' ngajar. Wa'tu koa uga' ada urakng-urakng nang naik parahu lain nuna'an ia ka' koa. ³⁷ Ina' sangahé lama balayar ataknglah nyaru nang sisi miah kuat. Galumbang mulai' ngampas parahu sampe-sampe ai' tama' ka' parahu man parahu koa amper karapm ³⁸ Tapi Yesus tagah tidur ka' bagian balakang parahu, ia nguringan kapala-Nya ka' atas bantal. Murit-murit-Nya ngunak-Nya. Ia ka' koa bakata, “Pa' Guru, ahe ke' kita' ina' paduli, diri' cilakaa'?” ³⁹ Yesus lumpat lalu nyuruh nyaru man galumbang nang kuat koa badiapm, jakata-Nya, “Diapm man tananglah!” Nyaru man galumbang nang kuat koa tapadiapm, lalu dano jaji sisi tanang. ⁴⁰ Lalu Yesus bakata ka' ia ka' koa, “Ngahe kita' sisi gali'? Ngahe kita' ina' pucaya'?” ⁴¹ Ia ka' koa jaji sisi gali' man bakata, “Sae urakng nian, sampe-sampe nyaru man dano pun nurut ka' Ia?”

Yesus nyamuhatn urakng nang kamasokatn setan dari Gerasa

(Mat. 8:28-34; Luk. 8:26-39)

5 Lalu sampelah Yesus man murit-murit-Nya, ka' sabarang dano, ka' da'erah urakng Gerasa. ²Baru' ja' Yesus turutn dari parahu, ataknglah saurakng nang kamasokatn setan dari pasuburatn namui' Ia. ³Urakng koa diapm ka' pasuburatn man ina' ada saurakngpun nang sanggup ngikatnya, biar pun make rante. ⁴Wa'tu paha man kokotnya di ngikat man rante basi, rante koa nyamutusatn, rante nang ka' kokotnya koa nya mutusatn man rante nang ka' pakahe koapun uga' dinya ngampasatn sampe ancur. Ina' ada saurakng pun nang mampu ngamanan nya. ⁵Siakng malam ia ulakng-ulakng ka' tea' subur man ka' bukit-bukit sambil kampak-kampak man mangkongi' diri'nya make batu. ⁶Taka' ia nele' Yesus dari jauh, ia batalama' notok Yesus, lalu sujut nyambah ka' adapatn Yesus. ⁷Setan koa ngampak man bakata, “O Yesus, Anak Allah nang miah bakuasa, ahe urusan Kita' man aku? Demi Allah, amelah nyiksa aku!” ⁸Ia bakata lekoa tagal sanape'nya Yesus suah bakata ka' ia, “Setan! Kaluar kao dari urakng nian!” ⁹Lalu Yesus batanya' agi' ka' ia, “Sae damanyu?” Kata urakng koa, “Aku Legion, tagal kami banyak .” ¹⁰Ia sidi bapinta' ka' Yesus biar ame ngansar setan-setan koa kaluar dari da'erah koa.

¹¹Wa'tu koa, ka' tabikng bukit koa sidi banyak jalu nang tagah bagago' makatn. ¹²Setan-setan koa sidi bapinta' ka' Yesus katanya, “Suruhlah kami tama' ka' dalapm babotn-babotn

koa.”¹³ Man Yesus satuju. Jadi, setan-setan koa kaluar dari urakng koa lalu tama' ka' babotn-babotn koa. Kabatn babotn koa jumbalahnya kira-kira samuanya dua ribu eko' samuanya tarajutn ka' tapi jurang ka' dalapm dano koa man mati lamas samuanya.

¹⁴Jaji panjaga-panjaga babotn-babotn koa nele' ahe nang dah jaji koa, ia ka' koa batilama' ka' kota man ka' kampokng-kampokng gunar koa sambil ngesahatn hal koa. Lalu kaluarlah urakng-urakng untu' nele' ahe nang dah jaji koa.

¹⁵Ia ka' koa atakng ka' Yesus, lalu nele' urakng nang tadinya kamasokatn setan koa, tagah duduk di'koa. Ia dah bapakean, man pikirannya dah baik. Tagal koa ia ka' koa jaji sidi gali' ka' Yesus. ¹⁶Urakng-urakng nang dah nele' babaro hal koa ngesahatn ka' ia ka' koa tentang ahe nang dah jaji ka' urakng nang kamasokatn setan koa, man tentang babotn-babotn koa.

¹⁷Lalu panduduk da'erah koa minta' biar Yesus ninggalatn da'erah koa.

¹⁸Wa'tu Yesus naik ka' dalapm parahu, urakng nang tadinya kamasokatn setan koa minta' ka' Yesus biar ia mulih nuna'an-Nya. ¹⁹Tapi Yesus ina' satuju, kata-Nya, “Pulaknglah man bare' nau'an ka' page warisnyu ahe nang dah Allah manjawat, Ia sidi kasihatn ka' kao!” ²⁰Urakng koa pun ampus man mulai' ngesahatn ka' da'erah Dekapolis ahe nang dah Yesus manjawat ka' ia. Samua urakng sidi heran nangngarnya.

**Yesus ngidupatn anak Yairus dari kamatiatn man
nyamuhatn nangbini nang sakit pandarahan**

(Mat. 9:18-26; Luk. 8:40-56)

²¹ Udah koa Yesus nyabarang agi' ka' sabarang dano, ka' tapi dano koa rami urakng nang atakng ngarumuni' Ia. ²² Ataknglah saurakng nang badama Yairus. Ia saurakng kapala' rumah tempat sumbayang ka' kota koa. Taka' ia nele' Yesus, ia sujud ka' adapatn-Nya, ²³ man bapinta' sidi, “Pa', anakku nangbini sakit parah man amper mati, banto' ataknglah man jamehlah biar ia samuh man tatap idup!” ²⁴ Lalu ampushlah Yesus man Yairus. Rami urakng nang nuna'an Ia, sampe bapeset-peset ka' samak-Nya.

²⁵ Ka' tea' urakng koa ada saurakng nangbini nang dah dua balas tahutn lamanya sakit pandarahan. ²⁶ Nangbini koa sidi singsara. Samua kakayaatnnya dah abis dimake untu' barobat ka' mantari-mantari, tapi ina' ada nang bisa nyamuhatnnya, malahan panyakitnya sia' parah. ²⁷ Nangbini koa dah banyak nangngar kabar tentang Yesus. Jaji ia nuna'an Yesus dari balakang ka' tea' urakng-urakng rami koa man nyangkam jubah-Nya. ²⁸ Tagal ia bapikir, “Kade' kujameh ja' jubah-Nya, aku pasti samuha!” ²⁹ Wa'tu ia nyangkam jubah-Nya koa, pandarahannya langsung baranti man ia marasa kade' tubuhnya dah ina' sakit agi'. ³⁰ Ka' wa'tu koa uga' Yesus marasa kade' ada kuasa nang kaluar dari diri'-Nya. Ia malek ka' urakng nang rami koa man batanya', “Sae nang nyangkam jubah-Ku?” ³¹ Murit-murit-Nya nyahut, “Pa' Guru Kita' nele'

lea mae urakng nian bapeset-peset samak Kita', tapi Kita' batanya', Sae nang nyangkam Aku?" ³² Tapi Yesus tarus ja' maratiatnni' sakulilikng-Nya ngago'i' urakng nang dah nyangkam jubah-Nya. ³³ Nangbini koa nau'an ahe nang dah jaji ka' diri'nya, kagali'anan man basiragotatn ia atakng ka' Yesus ngako'i' samuanya. ³⁴ Lalu Yesus bakata ka' nangbini koa, "Anak-Ku, tagal kao pucaya' ka' Aku, kao sidi-sidi dah samuh! Pulaknglah baati nang dame. Kao dah samuh!"

³⁵ Samintara Yesus masih ngomong, sangahe urakng atakng dari rumah Yairus. Man bakata ka' ia, "Anak kita' dah mati, ame agi' kita' nyusahi' Pa' Guru" ³⁶ Yesus uga' nangngar kabar koa tapi Ia ina' maduliatn ahe nang dinya ka' koa ngataatn, Yesus bakata ka' Yairus, "Ame gali' pucaya' ja'!" ³⁷ Lalu Yesus bajalatn tarus, tapi Ia ina' ngijinan saurakngpun ngikuti'-Nya kacoali Petrus, Yakobus nyamadi' Yohanes. ³⁸ Taka' ia ka' koa namus ka' rumah Yairus, Yesus nele' urakng-urakng riuh man bangeakatn ³⁹ Lalu Yesus tama' man bakata ka' ia ka' koa, "Ngahe kita' mangka' keak? Kamuda' koa ina' mati, tapi tidur!" ⁴⁰ Tapi ia ka' koa ngalakatn Yesus.

Lalu Ia ngoser urakng-urakng ka' koa kaluar, Ia maba uwe', apa' kamuda' koa man katalu murit-Nya tama' ka' dalapm kamar kamuda' koa. ⁴¹ Yesus nyingi'i' kokot kamuda' koa lalu bakata ka' ia, "Talita kum," ratinya, "Kamuda' nangbini Aku bakata ka' kao, lumpatlah!" ⁴² Kamuda' koa dah baumur dua balas tahutn. Taka' koa uga', kamuda' koa lumpat man bajalatn. Samua urakng nang nele' hal koa jaji sidi heran! ⁴³ Tapi Yesus sidi mai'an biar ia

ka' koa ame madahatn hal koa ka' saepun, lalu kata-Nya, “Bare' kamuda' koa makatn.”

Yesus ina' ditarima' ka' Nasaret kampokng alaman-Nya

(Mat. 13:53-58; Luk. 4:16-30)

6 Dari tempat koa, Yesus pulakng sama-sama man murid-murid-Nya ka' kampokng alaman-Nya. ²Ka' ari Sabat Ia mulai' ngajar ka' rumah tempat sumbayang. Sidi miah rami urakng ka' di'koa. Wa'tu urakng-urakng koa nangngar pangajaran Yesus, ia ka' koa sidi heran. Ia ka' koa bakata, “Dari mae urakng nian namu samuanya koa? Kabijaksanaan lea ahe nian nang ada ka' Ia? Leamae Ia baya manjawat hal nang ajaip? ³Ina' ke' Yesus nian tukang kayu, anak Maria, adi' baradi' Yakobus, Yoses, Yudas man Simon? Man adi' baradi'-Nya nangbini pun uga' ada ka' dian.” Lalu ia ka' koa kacewa man nolak-Nya. ⁴Lalu Yesus bakata ka' ia ka' koa, “Saurakng nabi dihormati' ka' samua kampokng, kacoali ka' kampokng alamannya, man ka' antara kamarkapalanya man page warisnya.” ⁵Ka' tempat koa Yesus ina' baya manjawat sote'pun hal-hal nang ajaip, kacoali nyamuhatn basangahe urakng sakit make cara nyangkamnya. ^{6a}Yesus sidi heran ka' ia ka' koa ina' pucaya' ka' Ia.

Yesus ngiripm kaduabalas rasul

(*Mat. 10:5-15; Luk. 9:1-6*)

^{6b} Lalu Yesus bajalatn dari desa ka' desa sambil ngajar.

⁷ Ia nyaru' kaduabalas murid koa man ngiripm ia ka' koa badua-badua. Ia mare' kuasa ka' murid-murit-Nya koa kuasa untu' ngoser setan-setan. ⁸ Man bapapatn ka' ia ka' koa biar ame ngincakng ahe-ahe ka' dalapm pajalanannya, kacoali tungkat. Ame incakng makanan, tas man duit. ⁹ Mulih make sapatu tapi ina' mulih make dua balah baju. ¹⁰ Ia uga' bakata, “Kade' kita' tama' ka' sabuah rumah, badiapmlah di'koa sampe kita' ningalatn kota koa. ¹¹ Tapi kade' urakng-urakng ka' koa nolak kita' ato bai nangngar ahe nang kita' ngajaratn, tingalatnlah kota koa. Man wa'tu kita' berangkat kiboatn dabu ka' pahanyu, jaji tanda kade' kita' lapas tangan kade' ia ka' koa basalah man di Allah ukuma.” ¹² Lalu ampuslah ia ka' koa ngesahatn kade' urakng-urakng arus batobat, ¹³ man ia ka' koa ngoser manyak setan, nolesatn binyak jaitun ka' urakng nang sakit man nyamuhatn ia ka' koa.

Yohanes Pamaptis dibunuh

(*Mat. 14:1-12; Luk. 9:7-9*)

¹⁴ Raja Herodes uga' nangngar tentang Yesus, tagal dama-Nya dah dikanal man urakng-urakng bakata, “Yesus koa lah Yohanes Pamabtis nang dah lumpat dari antara urakng mati, koalah tagalnya kuasa-kuasa koa bakaraja ka' dalapm-Nya.” ¹⁵ Ada uga' nang lain bakata, “Ia koa nabi Elia!” Nang lain agi'

bakata, “Ia koa saurakng nabi sama lea nabi-nabi nang de'e.”
¹⁶ Taka' Herodes nangngar koa, ia bakata, “Pasti nian Yohanes Pamaptis nang de'e dah ku nyuruh tangkadas kapalanya. Ampeatn ia dah mulakng idup!”

¹⁷ Tagal de'e nya ingka' Herodeslah nang nyuruh urakng nangkap Yohanes man nama'annya ka' dalapm pinjara. Herodes babuat lea koa tagal Herodias, bini Pilipus adi' baradi'nya nang Herodes naap bini, ¹⁸ Tagal Yohanes suah nagur Herodes, “Ina' mulih kao panganten man bini adi' baradi'nyu koa!” ¹⁹ Koa tagalnya Herodias dandam ka' Yohanes man sidi' mao' munuh Yohanes, tapi ia ina' baya manjawat hal koa. ²⁰ Tagal Herodes dah nyuruh urakng nyaga baik-baik kasalamatan Yohanes ka' dalapm pinjara, tagal ia gali' ka' Yohanes. Ia nau'an Yohanes saurakng nang baik nang di Allah ngiripm. Man Herodes uga' suka nagar Yohanes kade' ia ngomong, biarge' atinya gulinsah.

²¹ Ahirnya Herodias namu kasampatan ka' ari ulang tahutn Herodes. Taka' koa Herodes manjawat gawe untu' samua pajabat tingi karajaan, perwira-perwira man tokoh-tokoh masarakat Galilea. ²² Ka' gawe koa anak dara Herodias nari, man tariannya koa sidi ngarepoatn ati Herodes man tamu-tamunya. Raja Herodes bakata ka' anak dara koa, “Minta' ja' ka' aku ahea' ma'an, pasti ku bare'atn ka' kao” ²³ Lalu raja basumpah ka' ia, “Ahe ja' nang nyuminta' ku bare'atnna' ka' kao, sakalipun saparoh karajaanku!” ²⁴ Kamuda' koa ampus ka' uwe'nya lalu batanya', “Ahe nang arus ku pinta'?” sahut uwe'nya, “Kapala Yohanes Pamaptis!” ²⁵ Lalu ganceh-ganceh ia ampus ka' raja man minta', “Aku mao', biar ampeatn uga' kita' bare'atn ka'

aku kapala Yohanes Pamaptis ka' atas ceper!"²⁶ Lalu sidi susah ati raja, tapi tagal sumpahnya man tagal tamu-tamunya ia ina' nolaknya.²⁷ Jaji ia langsung marentahatn pangawalnya naap kapala Yohanes Pamaptis. Pangawal koa ampus ka' pinjara lalu nangkadas kapala Yohanes.²⁸ Lalu ia ngincakng kapala Yohanes koa ka' atas ceper man nyarahatnnya ka' nang dara koa, man nangdara koa mare'atnya ka' uwe'nya.

²⁹ Wa'tu murid-murid Yohanes nangngar hal koa, ia ka' koa naap mayat Yohanes, lalu nyuburnya.

Yesus mare' makatn lima ribu urakng

(Mat. 14:13-21; Luk. 9:10-17; Yoh. 6:1-14)

³⁰ Rasul-rasul nang di Yesus ngiripm koa mulakng man bakomo' agi' ka' Yesus. Ia ka' koa ngalaporatn ka' Yesus samua nang dah dinya ka' koa manjawat man ngajaratn.³¹ Lalu Yesus bakata ka' ia ka' koa, "Inje'lah diri' ka' tempat sunyi', biar diri' sabaya diri' ihan, biar diri' baya ngadih sabantar!" Tagal ingka' sidi rami urakng nang baatangan man bapulangan, sampe-sampe Yesus man murid-muritnya pun ina' sempat makatn.³² Lalu berangkat lah ia ka' koa make parahu ka' tempat nang sunyi'.³³ Tapi rami urakng nang dah nele' ia ka' koa ningalatn tempat koa, man nau'an sae ia ka' koa. Jadi, dari samua kota ka' binua koa, urakng-urakng babatalama'an ampus lewat darat nyintolo'i' Yesus man murid-muritnya ka' koa.³⁴ Taka' Yesus turutn dari parahu, Ia nele' sidi rami urakng. Ia kasihatn

ka' ia ka' koa, tagal ia ka' koa lea domba nang ina' bapanjaga. Lalu Ia pun mulai' ngajaratn banyak hal ka' ia ka' koa.

³⁵ Taka' ari dah gumare', murid-murit-Nya bakata ka' Ia, “Ari dah gumare' man tempat nian jauh dari kampokng. ³⁶ Labih baik Kita' suruh urakng-urakng nian pulakng biar ia ka' koa baya mali makanan ka' desa-desa man ka' kampokng-kampokng gunar dian.” ³⁷ Tapi sahut Yesus, “Kita' ja' nang mare' ia ka' koa makatn.” Sahutnya ka' koa, “Ina' mungkin! Dari mae kami baya namu dua ratus kapikng duit perak untu' mali makanan untu' mare' makatn urakng sarami nian?” ³⁸ Lalu tanya' Yesus, “Sangahe ete' roti nang ada ka' kita'? Coba tele'.” Dah laka' ia ka' koa nele'nya, ia ka' koa bakata, “Lima ete' roti man dua eko' ikatn.” ³⁹ Lalu Yesus nyuruh samua urakng ka' koa duduk bakalompok-kalompok ka' atas rumput nang ijo. ⁴⁰ Lalu duduklah ia ka' koa bakalompok-kalompok, ada nang saratus urakng ada nang lima puluh urakng. ⁴¹ Lalu Yesus naap lima roti man dua eko' ikatn koa, lalu ningkadah ka' langit basukur batarima' kasih ka' Allah. Laka' koa, Ia nyempak-nyempak roti koa lalu mare'atnnya ka' murid-murit-Nya biar dibagiatn ka' samua urakng di koa. Man dua eko' ikatn koa dimagi-magiatn uga' ka' samua urakng. ⁴² Man ia ka' koa samuanya makatn sampe kanyang. ⁴³ Lalu murid-murit ngomo'an loa' makanan koa, samuanya ada dua balas bakul. ⁴⁴ Nanglaki nang makatn roti koa samuanya bajumbalah kira-kira lima ribu urakng nape' taretong nangbini man kamuda'-kamuda'.

Yesus bajalatn ka' atas ai'

(Mat. 14:13-21; Luk. 9:10-17; Yoh. 6:1-14)

⁴⁵ Laka' koa Yesus langsung nyuruh murid-murit-Nya naik ka' parahu man barangkat labih dolo' ka' sabarang, ka' Betsaida, samintara koa Ia nyuruh urakng rami koa pulakng. ⁴⁶ Lalu Ia babaro ampus ka' bukit untu' bado'a ⁴⁷ Taka' ari dah malam, parahu murid-muritnya dah ka' tengah dano, sedangkan Yesus masih ka' darat. ⁴⁸ Yesus nele' sidi payahnya ia ka' koa ngayuh parahunya tagal nyaru balawanan arah man parahu. Tagal koa, kira-kira jam talu malam, Yesus atakng ka' ia ka' koa bajalatn ka' atas ai'. Man Ia bajalatn saolah-olah ngalintasa' ia ka' koa. ⁴⁹ Wa'tu ia ka' koa nele' Yesus bajalatn ka' atas ai' ia ka' koa ngira kade' Yesus koa antu, lalu ia ka' koa mangka' kampak ⁵⁰ Tagal ia ka' koa samua nele'-Nya man sidi miah takajut. Tapi langsung Yesus ngomong ka' ia ka' koa, "Tananglah! nian Aku. Ame gali!" ⁵¹ Lalu Ia naik ka' parahu nya ka' koa, man nyaru koa pun jaji tado'. Murit-murit Yesus sidi heran. ⁵² Biarpun dah nele' hal-hal ajaip nang Yesus manjawat man lima roti dua eko' ikatn koa, ia ka' koa tatap gi' nape' uga' ngarati sae Yesus sabatolnya, tagal ati man pikiran nya ka' koa masih tatutup.

Yesus nyamuhatn urakng-urakng sakit ka' Genesaret

(Mat. 14:34-36)

⁵³ Wa'tu namus ka' sabarang dano, ia ka' koa batambat ka' tapi dano Genesaret. ⁵⁴ Taka' ia ka' koa kaluar dari

parahu, urakng-urakng ka' koa nele' kade' nang atakng koa Yesus. ⁵⁵ Lalu Ia ka' koa babatalama'an ka' sigana da'erah koa bapadah kade' Yesus dah mulakng. Lalu urakng-urakng ka' koa ngincakng urakng nang sakit ka' Yesus sambil nangkonnya make tandu ka' maea' ma'an ia ka' koa nangngar kabar kade' Yesus ada. ⁵⁶ Ka' mae ja' Ia ampus, ka' desa-desa, ka' kota-kota, ka' kampokng-kampokng, urakng-urakng nguringan urakng sakit ka' pasar sambil bapinta' sidi, biar ia ka' koa diijinan nyangkam jubah Yesus biar ga' ujukngnya. Lalu samua urakng nang nyangkamnya jaji samuh.

Parentah Allah man adat istiadat urakng Yahudi

(Mat. 15:1-20)

7 Lalu urakng-urakng Parisi man sangahe urakng ahli Torat dari Yerusalem atakng namui' Yesus. ² Ia ka' koa nele', kade' sangahe urakng murid Yesus makatn man kokot nang ina' baraseh, makatn man kokot ina' di sasah. ³ Tagal urakng-urakng Parisi lea urakng-urakng Yahudi nang lainnya ina' makatn kade' ina' basasah kokot dolo', barang ia ka' koa ngasi' ka' adat istiadat ene' moyang nya. ⁴ Man kade' pulakng dari pasar ia ka' koa ina' makatn kade' ina' marasehatn diri'nya dolo'. Rami paraturan lain agi' dari ene' uyutnya nang di nya ka' koa naati', umpamanya nyasah cawan, cere' man pakakas-pakakas timaga. ⁵ Tagal koa urakng-urakng Parisi man guru-guru agama Yahudi koa batanya' ka' Yesus, “Ngahe murid-murid Kita' bai' idup nuruti' adat istiadat ene' moyang diri', tapi makatn man kokot

najis?” ⁶ Sahut Yesus ka' ia ka' koa, “Banarlah nubuat nabi Yesaya tentang kita', O urakng-urakng munapik! Tagal ada taconteng,

Allah bakata bangsa nian nyambah Aku man molotnya, sabatolnya atinya jauh man Aku.

⁷ Toa'-toa' ia ka' koa sumbayang ka' Aku,

sedangkan ajaran nang di nya ngajaratn parentah talino.

⁸ Parentah Allah ina' di kita' paduliatn tapi kita' labih ngasi' ka' adat istiadat talino.”

⁹ Yesus bakata agi' ka' ia ka' koa, “Sidi panenya kita' ina' paduli ka' parentah Allah, biar kita' tatap mihara adat istiadat kita' babaro. ¹⁰ Tagal Musa dah bakata, Sae nang ngutuki' apa'nya man uwe'nya arus mati. ¹¹ Tapi kita' bakata ina' salah kade' saurakng bakata ka' apa'nya ato uwe'nya, Ahe nang ada ka' aku, nang dipaguna'anna' untu' mihara kita', dah di maguna'an untu' korban pasembahan ka' Allah, ¹² Jaji kita' miaratnnya agi' untu' ina' manto' apa' man uwe'nya. ¹³ Man cara lea koa kita' ina' paduli ka' pakataatn Allah man mampauti' kabiasaan adat istiadat nang kita' nurunan ka' urakng lain. Uga' ada banyak agi' aturan nang dah kita' muat lea koa.”

¹⁴ Lalu Yesus nyaru' agi' urakng nang rami man bakata ka' ia ka' koa, “Dangngar boh baik-baik! biar kita' ngarati ¹⁵ Ahe pun nang dari luar tama' ka' molot urakng koa, ina' manjawat urakng koa jaji najis, tapi ahe nang kaluar dari molot urakng koa, koalah nang manjawat urakng koa najis.” ¹⁶ [Jaji sae nang batarenyekng Dangngarlah baik-baik]

¹⁷Taka' Yesus ningalatn urakng rami koa tama' ka' rumah, murid-murit-Nya batanya' ka' Ia tentang maksud parumpamaan koa. ¹⁸Lalu sahut Yesus, “Ahe ke' kita' nape' uga' ngarati? Ahe ke' kita' ina' bisa ngarati kade' nang tama' ka' dalapm molot urakng koa ina' manjawat urakng koa najis? ¹⁹Tagal nang tama' ka' dalapm molot urakng koa ina' lewat ati, tapi lewat parut, man laka' koa kaluar agi' ka' pamahira'atn.” Man kata-kata-Nya koa Yesus madahatn kade' samua makanan ina' haram. ²⁰Lalu Yesus bakata agi', “Ahe nang kaluar dari molot urakng koa, koalah nang najisatnnya. ²¹Tagal dari dalapm ati urakng, timul sigana pikiran jahat, sigana macam dosa (pikiran, pakataatn, man ahe nang dipanjawat) nang baubungan man kamaluatn talino, pangalit, munuh, ²²babaya', sarakah, curang, hawa napsu, rusi' ati, hojat, kasombongan, kabagaatn. ²³Samua hal-hal nang jahat nian timul dari dalapm, koalah nang manjawat urakng najis.”

Nangbini bangsa Siro-Penisia nang pucaya'

(Mat. 15:21-28)

²⁴Lalu Yesus ningalatn tempat koa, man ampus ka' da'erah samak kota Tirus. Ia tama' ka' dalapm sabuah rumah man Ia bai' kade' ada urakng nang nau'an diri'-Nya ada di'koa. Tapi Yesus ina' baya nosokatn diri'-Nya. ²⁵Bahkan uwe' kamuda' nangbini nang di roh jahat nguasai' nangngar tentang Yesus atakng man balutut ka' adapatn-Nya. ²⁶Nangbini koa urakng Yunani bangsa Siro-Penisia. Ia minta' ka' Yesus untu' ngoser setan koa dari kamuda'nya nangbini. ²⁷Lalu Yesus bakata ka' ia,

“Biarlah kamuda'-kamuda' kanyang dolo', tagal ina' patut naap roti nang di nyiapatn untu' kamuda'-kamuda' man nabakatnnya ka' asu.”²⁸ Tapi nangbini koa nyahut, “Banar, Tuhan. Asu' nang ka' babah meja uga' makatn paluguratn-paluguratn nang di kamuda'-kamuda' nyantu'atn.”²⁹ Lalu kata Yesus ka' nangbini koa, “Tagal kata-kata nyu koa, pulaknglah ampeatn tagal setan koa dah kaluar dari anak nyu.”³⁰ Nangbini koa pulakng ka' rumahnya, lalu napatu' anaknya tagah gurikng ka' tempat tidur, setan koa banar-banar dah kaluar dari anaknya.

Yesus nyamuhatn urakng nang bangal man awa'

³¹ Lalu Yesus ningalatn binua Tirus, narusatn pajalanan-Nya ngalalui' Sidon ampus ka' dano Galilea, ka' tengah-tengah binua Dekapolis. ³² Di'koa ada saurakng nang bangal man awa' di na' ayungannya ngincakng ka' Yesus. Ia ka' koa minta' ka' Yesus untu' ngangkat kokot-Nya ka' atas urakng koa. ³³ Yesus ngincakng urakng koa aga' jauh dari urakng rami, lalu nama'an jari-Nya ka' dalapm kadua tarenyekng urakng koa. Baru Ia ngalujah, man ngaraba jilah urakng koa. ³⁴ Laka' koa Yesus ningkadah ka' langit, lalu narik sengat man bakata ka' urakng koa, “Epata” nang ratinya, “Tabuka'lah!” ³⁵ Tarenyekng urakng koa tabuka' man jilahnya jaji lamut agi', ia pun mulai' ngomong edo'. ³⁶ Lalu Yesus mai'an urakng ka' koa ngesahatn hal koa ka' sae pun. Tapi sia' di bai'atn sia' luas tasabar hal koa di urakng ka' koa ngesahatn. ³⁷ Samua urakng nang nangngar hal koa sidi' heran. Ia ka' koa bakata, “Samuanya di-Nya nyajiatn baik! Nang bangal jaji nangngar man nang awa' jaji ngomong!”

Yesus mare' makatn ampat ribu urakng

(*Mat. 15:32-39*)

8 Ina' sangahe lama laka' koa, ada agi' sakalompok urakng rami bakomo'. Tagal ia ka' koa ina' bapamakanan, Yesus nyaru' murid-murit-Nya man bakata, ²“Aku kasihatn ka' urakng rami nian. Dah talu ari ia ka' kea sama-sama man Aku, tapi ampeatn dah na' ada agi' pamakanan. ³Kade' Aku nyuruh ia ka' kea pulakng man parut kosong, jangan-jangan ia ka' kea tasalap ka' tengah maraga. Ahe agi' ka' antaranya ka' kea ada nang atakng dari jauh.” ⁴Murid-murid Yesus nyahut, “Ka' tempat nian tempat nang sunyi', Ka' mae urakng bisa namu pamakanan nang cukup untu' samua urakng nian?” ⁵Yesus batanya' ka' ia ka' koa, “Sangahe banyak roti nang ada ka' kita'?” Sahutnya ka' koa, “Tujuh ete” ⁶Lalu Yesus nyuruh urakng rami koa duduk ka' atas tanah, baru' Ia naap tujuh ete' roti koa man basukur ka' Allah. Laka' koa Ia nyempak-nyempak roti koa man kokot-Nya man mare'atnnya ka' murid-muritnya-Nya untu' di bagi-bagi ka' urakng-urakng rami koa. Lalu murid-murit-Nya magi-magiatn roti koa. ⁷Ka' ia ka' koa uga' ada sangahe eko' ikatn-ikatn nang enek. Yesus basukur ka' Allah untu' ikatn-ikatn koa, lalu nyuruh murid-murit-Nya magi-magiatn ikatn koa uga'. ⁸Ia ka' koa pun makatn sampe kanyang. Laka' koa urakng ngomo'an sempakatn-sempakatn roti nang basisa, banyaknya tujuh bakul. ⁹Nang makatn koa ada kurang labih ampat ribu urakng. Lalu Yesus nyuruh ia ka' koa pulakng. ¹⁰Yesus pun naik ka' parahu man murid-murit-Nya ampus ka' da'erah Dalmanuta.

Urakng Parisi minta' tanda

(Mat. 16:1-4)

¹¹ Lalu sangahe urakng Parisi atakng baso'al jawab man Yesus. Untu' nyobai-Nya, ia ka' koa minta' Yesus manjawab hal nang ajaip tanda dari langit kade' Ia atakng dari Allah. ¹² Yesus mansengat lanu', kasal man bakata, “Ngahe urakng-urakng ka' jaman nian minta' tanda? Aku bakata ka' kita', sabatolnya urakng-urakng koa sakali-kali ina' di bare'a' tanda.” ¹³ Lalu Yesus ningalatn ia ka' koa; Ia naik ka' parahu man batulak ka' sabarang.

Tentang ragi urakng Parisi man ragi Herodes

(Mat. 16:5-12)

¹⁴ Taka' ia ka' koa tagah balayar rupanya pangikut-pangikut Yesus lupa ngincakng roti nang cukup. Nang ada cuman sote' ihan ka' ia ka' koa ka' dalapm parahu. ¹⁵ Lalu Yesus ngingati' ia ka' koa, kata-Nya, “Ati-atilah ka' ragi urakng Parisi man ragi Herodes.” ¹⁶ Jaji pangikut-pangikut Yesus ngomongan hal koa. Ia ka' koa bakata ka' seko' man nang lainnya, “Ia bakata lekoa mungkin tagal diri' ina' ada cukup roti.” ¹⁷ Yesus nau'an ahe nang di nya ka' koa maso'alatn. Tagal koa Yesus batanya' ka' ia ka' koa, “Ngahe kita' maso'alatn tentang ina' baroti? Ahe ke' kita' ina' nau'an man nape' ngarati uga'? Sidi bodonya pikiran kita'? ¹⁸ Kita' bamata ngahe ina' nele'? Kita' batarenyekng ngahe ina' nangngar? Ina' ke' kita' ingat agi', ¹⁹ Ka' wa'tu Aku

nyempak-nyempak lima ete' roti untu' lima ribu urakng koa, sangahe bakul binsi' sempakatn roti kita' ngomo'an?" Sahut nya ka' koa, "Dua balas bakul." ²⁰ "Man ka' wa'tu tujuh roti untu' ampat ribu urakng koa, sangahe bakul binsi' sempakatn roti kita' ngomo'an?" Sahut nya ka' koa, "Tujuh bakul." ²¹ Lalu kata Yesus ka' ia ka' koa, "Masih ke' kita' nape' ngarati?"

Yesus nyamuhatn urakng buta' ka' Betsaida

²² Laka' koa Yesus man murid-murid-Nya atakng ka' Betsaida. Ka' di'koa urakng ngincakng ka' Yesus saurakng buta' man ia ka' koa minta' biar Yesus nyantuh urakng buta' koa. ²³ Yesus nyangi'i' kokot urakng buta' koa man ngincakngnya kaluar kampokng. Lalu Ia ngalujahi' mata urakng koa man nyangkam kadua matanya, Yesus batanya', "Udah ke' kao nele'?" ²⁴ Urakng koa nele' ka' depan, lalu bakata, "Aku nele' urakng bajalatn-jalatn, tapi lea puhutn-puhutn kayu." ²⁵ Yesus nyangkam agi' kadua mata urakng koa, lalu urakng koa sisi-sidi nele' man dah samuh, sampe ia baya nele' samuanya sisi jelas. ²⁶ Lalu Yesus nyuruh ia pulakng ka' rumahnya man bakata, "Ame tama' ka' kampokng koa agi'!"

Petrus ngako'i' kade' Yesus Raja Panyalamat

(Mat. 16:13-20; Luk. 9:18-21)

²⁷ Laka' koa Yesus man murid-murid-Nya berangkat ka' kampokng-kampokng ka' gunar Kaisarea Pilipi. Ka' tengah maraga Yesus batanya' ka' ia ka' koa, "Jakata urakng, sae

Aku nian?”²⁸ Sahutnya ka' koa, “Ada nang bakata, Yohanes Pamaptis; ada uga' nang bakata, Elia, man nang lain agi' bakata, salah saurakng dari nabi.”²⁹ “Tapi kade' nurut kita', sae Aku nian?” tanya Yesus. Petrus nyahut, “Kita' Raja Panyalamat!”³⁰ Lalu Yesus mai'an ia ka' koa bapadah ka' sae pun tentang diri'-Nya.

**Yesus ngomongan tentang
kasingsaraatn-Nya nang pamula'atn**

(Mat. 16:21-28; Luk. 9:22-27)

³¹ Laka' koa, Yesus mulai' ngajar murid-murit-Nya, kade' Anak Manunsia arus nanggong banyak kasingsaraatn man ina' di tarima' di pamimpin-pamimpin Yahudi, imam-imam kapala' Yahudi, man guru-guru agama. Ia di bunuha', tapi ari nang katalu Ia mulaknga' idup agi'.³² Yesus narangkatn hal koa ka' murid-murit-Nya sisi jelas. Lalu Petrus maba Yesus ka' samping man bakata ka' Ia, “Ame ngomong lekoa!”³³ Tapi Yesus malek man nele' murid-murit-Nya, lalu nagur Petrus, “Dari kao Ibalis, tagal kao buke' mikiri' ahe nang di Allah mikiri', tapi mikiri' ahe nang di talino mikiri'.”

³⁴ Lalu Yesus nyaru' urakng rami man murid-murit-Nya man bakata ka' ia ka' koa, “Tiap urakng nang mao' nuna' Aku, ia ina' maduliatn kapantingannya babaro, mikut salipnya lalu nuna'an Aku.³⁵ Barang sae nang mao' nyalamatatn tali sengatnya, ia kailangan tali sengatnya; Tapi sae pun nang kailangan tali sengatnya tagal Aku man Kabar Baik dari Allah, ia namua' idup

nang salamanya. ³⁶Ina' ada gunanya urakng ngampu' kakayaan ka' dunia nian, tapi ia ina' namua' idup nang salama-lamanya. ³⁷Tagal urakng ina' mampu mali idup nang salama-lamanya man haratanya koa.

³⁸Barang sae nang supe' ngako'i' Aku man pakataatn-Ku ka' antara urakng-urakng nang ina' satia man badosa nian, Anak Manunsia pun uga' supe'a' ngako'i' urakng koa, ka' wa'tu Ia atakngnga' ana man kuasa Apa-Nya, sama-sama man mala'ekat-mala'ekat nang Kudus dari saruga.”

9 Yesus bakata agi', “Aku bakata ka' kita', sasidinya ka' antara kita' nang atakng ka' dian ina' matia' sanape' ia ka' koa nele' kade' Allah marentah jaji raja ka' sigana ai' tanah man panuh kuasa.”

Yesus ngomong man Musa man Elia

(Mat. 17:1-13; Luk. 9:28-36)

²Anam ari laka' koa Yesus maba Petrus, Yakobus man Yohanes naki' ka' bukit nang tingi. Ka' tempat koa cuman ia ka' koa ihan, ina' ada urakng lain. Di'koa ia ka' koa nele' Yesus barubah rupa, muhanya jaji basaho. ³Pakean-Nya jaji sisi putih man bakilat. Ina' ada saurakng pun ka' dunia nang pane nyasah pakean saputih koa. ⁴Lalu katalu murid Yesus koa

nele' Nabi Elia man Nabi Musa ada ka' di'koa. Kaduanya tagah ngomong man Yesus. ⁵ Nele' hal koa, Petrus bakata ka' Yesus, “Pa' Guru, sidi reponya kami ada ka' tempat nian. Lea mae kade' kami madiriatn talu buah kemah, sabuah untu' Kita', sabuah untu' Musa, sabuah untu' Elia.” ⁶ Sabatolnya Petrus ina' nau'an ahe nang ia arus kataatn, tagal ia man kadua ayukngnya sidi kagali'anan. ⁷ Laka' koa rahu' turutn ka' atas nya ka' koa man nutupi' nya. Ia ka' koa nangngar suara kaluar dari dalapm rahu' koa nang bakata lea nian, “Nianlah Anak-Ku, nang Ku-kasihi', kita' arus nangngaratn Ia.” ⁸ Ia ka' koa ganceh-ganceh nele' sakulilikng nya, tapi ina' nele' sae pun agi' kacoali Yesus babaro.

⁹ Wa'tu ia ka' koa turutn dari bukit koa, Yesus bapapatn ka' ia ka' koa, biar ia ka' koa ame ngesahatn ka' saurakng pun ahe nang dah di nya ka' koa nele', sanape' Anak Manunsia mulakng idup dari antara urakng mati. ¹⁰ Ia ka' koa naati' pasatn Yesus koa. Tapi nya talu koa kaja batanya' ka' seko' man nang lainnya ahe maksut Yesus, “Mulakng idup dari antara urakng mati.” ¹¹ Lalu ia ka' koa batanya' ka' Yesus, “Ngahe guru-guru agama bakata kade' Nabi Elia arus atakng labih dolo'?” ¹² Sahut Yesus, “Ingka' banar Nabi Elia arus atakng labih dolo' untu' nyiapatn sigananya. Tapi ahe nang taconteng ka' dalapm Kitap Suci tentang Anak Manunsia? Buke' ke' di ngataatn kade' Anak

9:4 *Nabi Elia man Nabi Musa* Musa nian pamimpin bangsa Israel nang narima' sapuluh ukum Allah, ia mati man dinyubur ka' tanah Moap. Ul 34:5-12, Nabi Elia saurakng nabi man pamimpin Yahudi nang miah penting nang ngomong untu' Allah kurang labih tahutn 850 SM ia ina' mati, tagal ia di Tuhan ngangkat ka' saruga, 2 raja-raja 2:11 **9:12** *Taconteng* kutipatn dari Sakaria 13:7, Yesaya 53:3

Manunsia arus banyak singsara man urakng-urakng nginaa' Ia?
¹³ Tapi ahe nang Aku ngataatn ka' kita' nian sidi miah banar, Ingka' Elia dah atakng. Tapi basangahe urakng manjawat hal nang ina' baik ka' ia. Sasuai man ahe nang dah dinyontengan tentang ia.”

**Yesus ngoser roh jahat nang ngarasuki'
 saurakng kamuda' nang awa'**

(Mat. 17:14-21; Luk. 9:37-43)

¹⁴ Taka' Yesus man katalu murid-Nya turutn dari bukit man mulakng ka' murid-murit nang lainnya. Ka' wa'tu koa ada rami urakng ngarumuni' murid-murit di'koa. Basangahe guru agama tagah badebat man murid-murit Yesus koa. ¹⁵ Lalu urakng rami koa nele' Yesus, man ia ka' koa sidi kaheranan. Ia ka' koa batilama' notok Yesus untu' nyambuta'-Nya. ¹⁶ Lalu Yesus batanya' ka' murid-murit-Nya, “Ahe nang kita' paso'alatn man ia ka' koa?” ¹⁷ Saurakng dari urakng rami koa nyahut, “Pa' Guru, anakku nian ku ngincakng ka' Kita', tagal ia di roh jahat ngarasuki' nang manjawat ia awa'. ¹⁸ Man tiap kali roh jahat koa nyarang ia, roh koa ngampasatnnya ka' tanah; lalu molotnya bapopo', giginya bagarek man tubuhnya jaji karo'. Aku dah minta' ka' murid-murit Kita', biar ia ka' koa ngoser roh jahat koa, tapi ia ka' koa ina' bisa.” ¹⁹ Lalu jakata Yesus ka' ia ka' koa, “O kita' urakng-urakng nang ina' sidi-sidi pucaya', sangahe lama agi' Aku arus badiapm ka' antara kita'? Sangahe lama agi' Aku arus sabar man kita'? Incakng kamuda' koa ka' dian!”

²⁰Ia ka' koa pun ngincakng kamuda' koa ka' Yesus, taka' roh jahat koa nele' Yesus, roh jahat koa manjawat tubuh kamuda' koa karojakng-karojakng sampe kamuda' koa tumakng ka' tanah babarikng-barikng, man molotnya bapopo'. ²¹Lalu Yesus batanya' ka' apa' kamuda' koa, “Dah sangahe lama ia lea nian?” Sahutnya, “Bamula ia gi' enek. ²²Roh jahat koa pancah nyeretnya ka' dalapm api man ka' dalapm ai' untu' munuha'nya. Tagal koa banto'lah man kasihatni'lah kami, kade' Kita' mampu nyamuhatn kamuda' nian!” ²³Sahut Yesus, “Ahe kata nyu, kade' Kita' mampu? Ina' ada nang mustahil untu' urakng nang pucaya!” ²⁴Apa' kamuda' koa bakata, “Aku pucaya'. Banto'lah aku biar lebih pucaya' agi!” ²⁵Taka' Yesus nele' urakng rami sia' bakarumun, Ia nagur roh jahat koa man nyuruh, “Roh bangal man awa' kaluar kao dari kamuda' nian man ame agi' sakali-kali tama' ka' kamuda' koa!” ²⁶Roh jahat koa ngampak, lalu manjawat tubuh kamuda' koa karojakng-karojakng, lalu roh jahat koa kaluar dari kamuda' koa. Kamuda' koa lea dah mati, sampe samua urakng bakata, “Ia dah mati.” ²⁷Tapi Yesus nyingi'i' kokot kamuda' koa man manto'nya lumpat. Kamuda' koa pun lumpat.

²⁸Yesus man murit-murit-Nya pun tama' ka' sabuah rumah, taka' ina' ada urakng lain man ia ka' koa. Murit-murit-Nya batanya' ka' Yesus, “Ngahe kami ina' mampu ngoser roh jahat koa?” ²⁹Yesus nyahut, “Roh jahat nang lea koa ina' baya di oser man cara ahe pun, kacoali man do'a.”

**Yesus ngomongan kadua kalinya kade'
Ia di bunuha' man mulaknga' idup agi'**

(Mat. 17:22-23; Luk. 9:43-45)

³⁰ Yesus man murid-murit-Nya barangkat dari koa ngalewati Galilea, man Yesus bai' di urakng-urakng tau'atn kade' Ia ada dikoa; ³¹ Tagal Ia tagah ngajar murid-murit-Nya. Ia bakata ka' murid-murit-Nya, “Anak Manunsia disarahatnna' ka' kuasa talino, man urakng-urakng ka' koa munuha' Ia, man talu ari laka' Ia di bunuh Ia mulaknga' idup dari kamatiatn.” ³² Murit-murit Yesus ina' ngarati pakataatn Yesus koa, tapi ia ka' koa ina' barani batanya' ka' Yesus.

**Murit-murit batangkar tentang sae nang
paling panting ka' antara murid**

(Mat. 18:1-5; Luk. 9:46-48)

³³ Yesus man murid-murit-Nya sampe ka' Kapernaum. Taka' ia ka' koa tama' ka' dalapm rumah, Yesus batanya' ka' murid-murit-Nya tentang ahe nang di nya ka' koa ngomongan wa'tu ia ka' koa ka' dalapm pajalanan. ³⁴ Tapi ia ka' koa ina' nyahut, tagal ka' dalapm pajalanan tadi ia ka' koa batangkar tentang sae nang paling tingi ka' antara nya ka' koa. ³⁵ Lalu Yesus duduk man nyaru' kaduabalas murid-Nya. Yesus bakata ka' ia ka' koa, “Sae nang mao' jaji nang paling tingi, ia arus naap tempat nang paling babah man arus jaji palayan untu' samua.” ³⁶ Lalu Yesus nyingi'i' kokot saurakng kamuda' enek

man nyuruh kamuda' koa badiri ka' adapatn nya ka' koa samua. Yesus ngapakng kamuda' koa man bakata ka' murid-murit-Nya, ³⁷“Sae ja' nang narima' saurakng kamuda' lea nian tagal Aku, barati narima' Aku. Man urakng nang narima' Aku, ia buke' ja' narima' Aku, tapi narima' uga' Ia nang ngiripm Aku.”

Saurakng nang buke' murid Yesus ngoser setan

(Luk. 9:49-50)

³⁸Lalu Yohanes bakata ka' Yesus, “Pa' Guru, kami nele' saurakng ngoser setan man nyabut dama Kita'. Kami nyuruh ia baranti manjawat lekoa, tagal ia buke' dari golongan diri'.” ³⁹Tapi Yesus bakata, “Ame bai'atn ia, tagal ina' saurakng pun nang manjawat hal-hal ajaip make dama-Ku, baya langsung majahat Aku. ⁴⁰Tagal sae nang ina' ngalawan diri', barati ia bapihak ka' diri'. ⁴¹Aku bakata ka' kita', Sabatolnya sae pun nang mare' kita' sacawan ai' cocok tagal kita' pangikut Raja Panyalamat, ia ina' kailangan upahnya.”

Hal-hal nang jaji panyabab urakng babuat dosa

(Mat. 18:6-9; Luk. 17:1-2)

⁴²“Barang sae nyasatatn salah seko' dari kamuda'-kamuda' enek nang pucaya' nian, lebih baik kade' batu pangilingandi ikatatn ka' tage'nya, man ia di buakng ka' dalapm laut. ⁴³Kade'

9:42 Batu kilanganbatu nang di make untu' ngiling bege' gandum ato bege'-bege' lainnya

kokot nyu panyabab kao babuat dosa, tataklah kokot nyu koa! Labih baik kao idup salamanya man Allah man sote' kokot ja' dari pada kao tatap man dua kokot, tapi tama' ka' naraka, ka' dalapm api nang nyala ma'an salamanya. ⁴⁴ [Di'koa ulat nang makatn tubuh urakng ina' matia' man apinya ina' padapmma'.] ⁴⁵ Man kade' sabarakng paha nyu panyabab kao babuat dosa, tataklah paha nyu koa! Labih baik kao idup salamanya man Allah man sabarakng paha ja', daripada kao tatap man dua barakng paha, tapi tama' ka' naraka. ⁴⁶ [Di'koa ulat nang makatn tubuh urakng ina' matia' man apinya ina' padapmma'.] ⁴⁷ Man kade' mata nyu panyabab kao babuat dosa congkellah mata nyu koa! Labih baik kao tama' ka' dalapm karajaan Allah man sabege' mata, daripada kao tatap man dua bege' mata, tapi di buakng ka' dalapm naraka. ⁴⁸ [Di'koa ulat nang makatn tubuh urakng ina' matia' man apinya ina' padapmma'.]

⁴⁹ Sabatolnya samua talino diujia' man kasusahatn nang rasanya lea angngatnya api.

⁵⁰ Gare' koa baik, tapi kade' gare' koa dah panat, kita' ina' baya nyajiatnnya pada' agi'.

Jadi, aruslah kita' jaji lea gare', iduplah basama-sama man akor.”

Ajaran tentang panganten man bacare

(Mat. 19:1-9)

10 Dari tempat koa Yesus man murit-murit-Nya bajalatn ka' binua Yudea man ka' binua sabarang sunge Yordan.

Urakng rami atakng agi' bakarumun ngulilikngi' Yesus. Lea biasanya Yesus ngajar ia ka' koa. ²Basangahe urakng Parisi uga' atakng ka' Yesus untu' nguji-Nya. Ia ka' koa batanya' ka' Yesus, “Nurut ukum Torat diri', Mulih ke' saurakng nanglaki nyare bininya?” ³Tapi sahut Yesus, “Ahe jarentah Musa ka' kita'?” ⁴Sahut nya ka' koa, “Musa mare' ijin untu' nyare bininya man manjawab surat care.” ⁵Tapi Yesus bakata ka' ia ka' koa, “Tagal kita' sidi karas kapala lah Musa nyontengan parentah koa untu' kita'.” ⁶“Tagal dari pamula'atnnya, Allah nampa' ia ka' koa nanglaki man nangbini. ⁷Koa tagalnya nanglaki ningalatnna' apa'nya man uwe'nya sote' man bininya, ⁸jaji nyadua koa jaji sote' isi'. Mpa koalah ka' mata Allah nanglaki man nangbini koa buke' agi' dua tapi sote'. ⁹Koa tagalnya ahe nang dah di Allah nyote'atn, ina' mulih di talino pacareatn.”

¹⁰Taka' ia ka' koa dah tama' ka' rumah, murid-murit-Nya batanya' ka' Yesus tentang hal koa agi'. ¹¹Lalu kata Yesus ka' ia ka' koa, “Sae nang nyareatn bininya lalu panganten man nangbini lain, urakng koa babaya' ka' bininya nang pertama koa. ¹²Man kade' nangbini nyareatn lakinya man panganten man nanglaki lain, ia babaya'.”

Yesus marakati' kamuda'-kamuda'

(Mat. 19:13-15; Luk. 18:15-17)

¹³Lalu urakng ngincakng kamuda'-kamuda' enek ka' Yesus, biar Ia marakati' ia ka' koa. Tapi murid-murit Yesus meraatn urakng-urakng koa. ¹⁴Taka' Yesus nele' hal koa, Ia bera man

bakata ka' murid-murit-Nya, “Biaratn kamuda'-kamuda' koa atakng ka' Aku, ame bai'atn ia ka' koa, tagal urakng-urakng nang lea koalah nang jaji warga karajaan Allah. ¹⁵Paratiatn boh, Sabatolnya kade' urakng ina' narima' karajaan Allah lea narima' saurakng kamuda' enek, urakng koa ina' bayaa' jaji warga ka' babah pamarentahan-Nya.” ¹⁶Laka' bakata lea koa, Yesus ngapakng kamuda'-kamuda' koa, lalu Ia nyangkam kapala nya ka' koa seko'-seko' man marakati' nya ka' koa.

Urakng kaya susah tama' Karajaan Allah

(Mat. 19:16-26; Luk. 18:18-27)

¹⁷Wa'tu Yesus berangkat untu' narusatn pajalanan-Nya, atakng saurakng nang batilama' notok Yesus sambil balutut ka' adapatn-Nya, urakng koa batanya', “Pa' Guru nang baik, ahe nang arus ku panjawat untu' namu idup nang salamanya?” ¹⁸Yesus nyahut, “Ngahe kao bakata Aku baik? Ina' ada nang baik salain Allah babaro. ¹⁹Kao tantu nau'an sigana parentah Allah, Ame munuh, ame babaya', ame ngalit, ame ngomong nang alok-alok kade' basaksi, ame ngurangi' hak urakng, hormatlah ka' apa' man uwe' nyu!” ²⁰Lalu kata urakng koa ka' Yesus, “Pa' Guru, samuanya koa dah ku nuruti' dari aku gi' muda'.” ²¹Tapi Yesus nele' urakng koa man kasih sayang, lalu bakata ka' ia, “Cuman sote' agi' nang nape' nyu panjawat. Pulaknglah, juallah sigana harata nang nyu ngampu'. Lalu bagi-bagiatn duitnya ka' urakng-urakng kodo, jaji kao namua' harata ka' saruga, laka' koa ataknglah ka' keatn man tuna'an

Aku.”²² Nangngar Yesus bakata lekoa, urakng koa kacewa, lalu ningalatn tempat koa man susah ati tagal harata nang nya ngampu' banyak.

²³ Lalu Yesus nele' murid-murit-Nya man bakata ka' ia ka' koa, “Susah sidi urakng kaya jaji warga kerajaan Allah!”

²⁴ Murit-murit-Nya takajut nangngar pakataatn-Nya koa. Tapi Yesus bakata agi', “Anak-anak-Ku ingka' sidi sulit untu' jaji warga kerajaan Allah.”²⁵ Labih mudah seko' onta ngalewati' lubakng jarupm daripada saurakng kaya tama' ka' dalapm Kerajaan Allah.”²⁶ Kata-kata Yesus koa manjawat murid-murit-Nya kahearanan, sampe ia ka' koa batanya' ka' seko' man nang lainnya, “Kade' lekoa sae nang baya di salamatatn?”

²⁷ Yesus nele' ia ka' koa man bakata, “Talino ingka' ina' baya nyalamatatn diri'nya babaro, tapi Allah baya nyalamatatn talino, tagal Allah baya manjawat ahea' ma'an.”

Upah nuna'an Yesus

(Mat. 19:27-30; Luk. 18:28-30)

²⁸ Petrus pun bakata ka' Yesus, “Kita' nau'an kami nian dah ningalatn samua nang kami ngampu' untu' nuna'an Kita!”²⁹ Sahut Yesus, “Aku bakata ka' kita', sabatolnya sigana urakng nang dah ningalatn rumahnya, kamarkapalanya nanglaki ato kamarkapalanya nangbini, ato apa'nya ato uwe'nya, ato kamuda'-kamuda'nya, ato umanya tagal nuna'an Aku man tagal Kabar Baik,³⁰ urakng koa namua' labih banyak ka' jaman ampeatn nian. Ia namua' saratus kali lipat,

Rumahnya, sodaranya nanglaki, sodaranya nangbini, uwe'nya, kamuda'-kamuda'nya, man umanya. Tapi ia uga' ngalamia' siksaan dari urakng tagal nuna'an Aku, ka' jaman pangabisatn dunia na'e nang atakngnga', urakng koa narima'a' idup nang salamanya. ³¹ Tapi rami urakng nang paling panting jajia' paling ina' panting, man urakng nang paling ina' panting jajia' paling panting.”

**Yesus bakata agi' nang katalu kalinya kade'
na'e Ia matia' man mulakng idup**

(Mat. 20:17-19; Luk. 18:31-34)

³² Yesus man kaduabalas murid-Nya tagah ka' pajalanan notok Yerusalem man Yesus bajalatn ka' depan. Kaduabalas murid-Nya marasa kuatir man uga' urakng-urakng nang nuna'an Nya dari balakang marasa gali'. Sakali agi' Yesus nyaru' kaduabalas murid-Nya man bakata ka' ia ka' koa ahe nang jajia' na'e ka' diri'-Nya. ³³ Kata-Nya, “Ampeatn diri' ampus ka' Yerusalem man Anak Manunsia disarahatnna' ka' imam-imam kapala' man guru agama Yahudi, man ia ka' koa nyantu'atnna' ukuman mati ka' Ia. Man ia ka' koa nyarahatnna' Ia ka' bangsa-bangsa nang ina' kanal ka' Allah. ³⁴ Man Ia diolo'-olo'a', dilujahi', disiksa man dibunuh, tapi ari nang katalu Ia mulakngnga' idup.”

Pamintaan Yakobus man Yohanes

(Mat. 20:20-28)

³⁵ Lalu Yakobus nyamadi' Yohanes, anak Sebedeus, nyamaki' Yesus man bakata ka' Ia, “Pa' Guru, kami baarap biar Kita' ngabulatn pamintaan kami!” ³⁶ Sahut Yesus ka' ia ka' koa, “Ahe nang kita' mao' Aku panjawat untu' kita?” ³⁷ Lalu kata nya ka' koa, “Kami mao' duduk ka'sabalah kanan Kita' man ka' sabalah keba' Kita', kade' atakng wa'tunya na'e Kita' dijunyukng tingi.” ³⁸ Tapi Yesus bakata ka' ia ka' koa, “Kita' ina' nau'an ahe nang kita' minta'. Ahe ke' kita' sanggup nyocok cawan kasingsaraatn lea nang Ku cocoka'? Ahe ke' kita' sanggup di baptis man baptisan kasingsaraatn lea nang arus Ku tarima?” ³⁹ Sahut nya ka' koa, “Kami sanggup.” Yesus bakata agi' ka' ia ka' koa, “Ingka' kita' nyocoka' cawan kasingsaraatn nang Ku cocoka'. Kita' di baptis man baptisan kasingsaraatn lea nang Ku tarima'. ⁴⁰ Tapi hal duduk ka' sabalah kanan-Ku, ato ka' sabalah keba'-Ku, Aku ina' bahak mare'atnnya. Koa dibare'atnna' ka' sae urakng-urakng nang dah di Allah nantuatn.”

⁴¹ Nangngar nang koa kasapuluh murid Yesus nang lain jaji bera ka' Yakobus man Yohanes. ⁴² Tapi Yesus nyaru' ia ka' koa lalu bakata, “Kita' nau'an, kade' ia ka' koa nang disabut pamarentah marentah rakyatnya man kokot basi, man pambesar-pambesarnya nyalanan kuasanya sidi karas ka' rakyatnya. ⁴³ Tapi kita' ina' mulih lekoa! Sabaliknya, urakng nang mao' jaji nang paling panting ka' antara kita', ia arus jaji palayan kita', ⁴⁴ man sae nang mao' jaji nang paling panting ka'

antara kita', ia arus jaji amba untu' samuanya. ⁴⁵ Tagal Anak Manunsia uga' atakng buke' untu' di layani', tapi untu' ngalayani' man mare'atn nyawa-Nya demi mebasatn rami urakng.”

Yesus nyamuhatn Bartimeus nang buta'

(Mat. 20:29-34; Luk. 18:35-43)

⁴⁶Lalu sampelah Yesus man murid-murit-Nya ka' Yeriko. Taka' Yesus man murid-murit-Nya man urakng rami kaluar dari Yeriko, ada saurakng buta' nang duduk minta'-minta' ka' tapi maraga. Damanya Bartimeus, anak Timeus. ⁴⁷Taka' nya nangngar nang lalu koa Yesus urakng Nasaret, ia ngampak, “Yesus, katurunan raja Daut! kasihatni'lah aku!” ⁴⁸Ia di urakng rami meraatn man nyuruhnya diapm. Tapi ia sia' kuat agi' ngampak, “Yesus katurunan raja Daut, kasihatni'lah aku!” ⁴⁹Lalu Yesus baranti man bakata, “Saru' ia!” Ia ka' koa nyaru' urakng buta' koa man bakata, “Kuatatnlah atinyu! Ia nyaru' kao, badirilah.” ⁵⁰Lalu ia nangalatn jubahnya, ganceh-ganceh badiri man notok Yesus. ⁵¹Yesus batanya' ka' ia, “Ahe nang kao mao' biar Ku panjawat ka' kao?” Sahut urakng buta' koa, “Pa' Guru, aku mao' nele!” ⁵²Lalu jakata Yesus ka' ia, “Ampuslah iman nyu dah nyalamatatn kao!” Taka' koa uga' ia baya nele', lalu ia nuna'an Yesus dalapm pajalanan-Nya.

Yesus tama' ka' kota Yerusalem

(*Mat. 21:1-9; Luk. 19:28-38; Yoh. 12:12-15*)

11 Taka' Yesus man murid-murit-Nya dah samak man kota Yerusalem, samak kampokng Betpage man kampokng Betania. Kadua kampokng koa ka' Bukit Jaitun. Yesus nyuruh dua urakng murid-Nya bajalatn labih dolo'. ²Kata Yesus, "Ampuslah ka' kampokng nang ka' depan naun, taka' kita' tama' ka' kampokng koa, kita' nele'a' seko' anak keledai nang di nambat nang gi' na' suah urakng taiki'. Lapasatn keledai koa incakng ka' keatn. ³Man kade' ada urakng batanya' ka' kita': ngahe kita' ngalapasatn keledai koa, sahuti'lah: 'Tuhan palalu. Ia mulangannya agi' ganceh ka' dian.' " ⁴Kadua murid Yesus koa pun ampus, man namu seko' keledai muda' nang di nambat ka' depan pintu rumah ka' tapi maraga lalu ngalapasatnnya. ⁵Man basangahe urakng nang ada ka' di'koa bakata ka' nya dua koa, "Ngahe kita' ngalapasatn keledai koa?" ⁶Lalu kadua murid Yesus koa nyahut lea nang di Yesus ngata'atn. Jaji urakng-urakng ka' koa miaratn nya dua ngincakng keledai koa. ⁷Lalu nya dua koa ngincakng keledai koa ka' Yesus, ngalasi'nya man jubah nya ka' koa, lalu Yesus naik ka' atasnya. ⁸Rami urakng ngampar jubahnya ka' maraga, ada uga' nang ngampar raba' kayu nang badaukng ijo nang di nya ngago' ka' uma. ⁹Urakng-urakng nang bajalatn ka' depan man nang nuna'an Yesus dari balakang bangampakatn,

"Pujilah Tuhan!

Di barakati'lah Ia nang atakngnga' atas dama Allah,
¹⁰ Dibarakati'lah Pamarentahan-Nya nang atakngnga', lea
 Pamarentahan Daut ene' moyang diri',
 Pujilah Allah nang miah tingi!"

¹¹ Sampenya ka' Yerusalem Yesus tama' ka' Rumah Allah
 . Di' koa Ia maratiatn sakulilikng-Nya. Tapi tagal ari dah
 amper patakng, Yesus berangkat ka' kampokng Betania man
 kaduabalas murid-Nya.

Yesus ngutuk puhutn ara'

(Mat. 21:18-19)

¹² Alapm ampaginya laka' Yesus man kaduabalas murid-Nya
 ningalatn Betania, Yesus marasa kaparatn. ¹³ Dari jauh Ia nele'
 puhutn ara' nang badaukng labat. Jaji Ia notok puhutn ara' koa
 untu' nele' ahe ke' ada buahnya. Tapi taka' Ia sampe ka' puhutn
 ara' koa, Ia ina' namu buahnya cuman daukng-daukng ihan,
 tagal wa'tu koa nape' musim buah ara'. ¹⁴ Lalu Yesus bakata ka'
 puhutn ara' koa, "Ame agi' saurakngpun nang makatn buahnyu
 salama-lamanya!" Man murid-murid-Nya pun nangngarnya.

Yesus tama' ka' Rumah Allah

(Mat. 21:12-17; Luk. 19:45-48; Yoh. 2:13-22)

¹⁵ Lalu sampelah Yesus man murid-murid-Nya ka' Yerusalem.
 Yesus tama' agi' ka' Rumah Allah , mulai'lah Ia ngoser samua

urakng-urakng nang bajual bali ka' alaman Rumah Allah . Meja-meja panukar duit man bangku-bangku panjual burukng dara di-Nya malik. ¹⁶Man Ia ina' ngijinan urakng-urakng ngincakng barang-barang ngalalui' Rumah Kudus Allah koa. ¹⁷Lalu Yesus ngajar ia ka' koa, “Buke' ke' ada taconteng, ‘Rumah-Ku di sabuta' Rumah Do'a untu' sigana bangsa?’ Tapi kita' nian dah nyajiatnnya tempat pangalit!” ¹⁸Imam-imam kapala' man guru-guru agama nangngar pakataatn koa. Ia ka' koa mulai' ngago' maraga untu' munuh Yesus tagal ia ka' koa gali' ka' Yesus, barang samua urakng kagum nangngar ajaran-Nya. ¹⁹Taka' ari dah bamula patakng Yesus man murit-murit-Nya ningalatn kota koa.

Palajaran dari puhutn ara'

(Mat. 21:20-22)

²⁰Alapm-alapm ampaginya, wa'tu ia ka' koa ngalewati' puhutn ara' koa, ia ka' koa nele' puhutn ara' koa dah mati sampe ka' urat-uratnya. ²¹Lalu taringatlah Petrus ka' ahe nang dah jadi, lalu ia bakata ka' Yesus, “Pa' Guru, tele'lah puhutn ara' nang kita' ngutuk koa dah karikng.” ²²Yesus nyahut, “Pucaya'lah ka' Allah! ²³Aku bakata ka' kita', Sabatolnya sae ja' bakata ka' panamukng nian, ‘Tarangkatlah man tabuaknglah ka' dalapm laut!’ Saga' ina' bimbang atinya, tapi pucaya', kade' ahe nang di nya ngataatn koa tajajia', pasti hal koa tajajia' ka' ia. ²⁴Tagal koa Aku bakata ka' kita', Ahe ja' nang kita' minta' man do'aatn, pucaya'lah kade' kita' dah narima'nya, jaji hal koa di bare'atna'

ka' kao. ²⁵ Kade' kita' bado'a, amponi'lah dolo' sakira'nya ada sakit ati ka' urakng, biar Apa'nyu nang ka' saruga uga' ngamponi' dosa-dosanyu.” ²⁶ [Kade' kita' ina' ngamponi' urakng lain, Apa'nyu nang ka' saruga uga' ina' ngamponia' dosa-dosanyu.]

Basangahe pamimpin Yahudi barusaha nyalahatn Yesus

(Mat. 21:23-27; Luk. 20:1-8)

²⁷ Yesus man murid-murit-Nya mulakng agi' ka' Yerusalem. Man wa'tu koa Yesus bajalatn ka' alaman Rumah Allah , imam-imam kapala', guru-guru agama man pamimpin-pamimpin Yahudi atakng ka' Yesus. ²⁸ Ia ka' koa batanya' ka' Yesus, “Ahe dasarnya Kita' manjawat samuanya nian? Man sae nang mare' kuasa ka' Kita', sampe Kita' manjawat hal-hal nian?” ²⁹ Sahut Yesus ka' ia koa ka' koa, “Aku uga' mao' batanya' ka' kita'. Kita' arus mare' jawabannya, man Aku uga' bapadaha' ka' kita' man kuasa sae Aku manjawat hal-hal koa. ³⁰ Baptisan Yohanes koa dari saruga ato dari talino?” ³¹ Lalu imam-imam kapala' man pamimpin-pamimpin Yahudi mulai' barunding, katanya ka' koa, “Kade' diri' bakata dari saruga, Ia bakataa', ‘Kade' lekoa ngahe kita' bai' pucaya' ka' ia?’” ³² Tapi, ina' mungkin diri' bakata dari talino!” Tagal ia ka' koa gali' ka' urakng rami, barang samua urakng nganggap kade' Yohanes batol-batol saurakng nabi. ³³ Lalu ia ka' koa nyahuti' Yesus, “Kami ina' nau'an.” Jaji kata Yesus ka' ia ka' koa, “Kade' lea koa, Aku uga' bai' bapadaha' ka' kita' man kuasa sae Aku manjawat hal-hal koa.”

**Parumpamaan tentang urakng-urakng
nang karaja ka' kabon anggur**

(Mat. 21:33-46; Luk. 20:9-19)

12 Lalu Yesus mulai' agi' ngesahatn ka' ia ka' koa parumpamaan, “Ada saurakng nang muka' kabon anggur man magar sakulilikng kabon koa. Ia manjawat lubakng ka' tanah tempat ngalaka'atn bak untu' marah anggurnya man madiri manara nyaga kabonnya koa. Laka' koa ia nyewaatn kabonnya koa ka' urakng-urakng. Lalu ia ampus ka' nagari lain. ²Taka' dah musim mebet buah anggur, ampu' kabon anggur koa nyuruh amba ulutnnnya ampus ka' nang nyewa kabonnya, untu' minta' tasih kabon koa. ³Tapi panyewa kabon koa nangkap amba ulutn koa, ia ka' koa mangkong man nyuruhnya pulakng ina' ngincakng ahe-ahe. ⁴Lalu ampu' kabon koa nyuruh agi' amba ulutnnya nang lain, lea koa uga' ia dimangkong sampe luka' kapalanya man sidi di masupe'i'. ⁵Ampu' kabon koa nyuruh agi' saurakng amba ulutnnya nang lain. Tapi ia ka' koa munuh amba ulutn koa uga', lea koa uga'lah satarusnya kalakuannya ka' koa ka' amba ulutn nang lainnya. Ada nang dimangkong ada uga' nang dimunuh. ⁶Ahirnya ina' ada agi' nang baya disuruh di ampu' kabon koa, kacoali anak tunggalnya nang sidi nya ngasihi'. Jaji ia nyuruh anaknya koa ampus tagal ia bapikir, ‘Tantulah anakku nian dinya ka' koa sagan!’ ⁷Tapi panyewa kabon koa bakata ka' sabayaatnnya, Ia nian ahli warisnya, inje' diri' munuhnya, na'e diri' nang ngampu'

kabon nian. ⁸ Ia ka' koa nangkapnya man munuhnya, lalu muang mayatnya ka' luar kabon koa.”

⁹ Laka' ngesahatn parumpamaan koa Yesus batanya' ka' ia ka' koa, “Coba kita' pikiri', kade' lea koa ahe nang mao' di ampu' kabon koa panjawata'? Tantu ampu' kabon koa atakngnga' man munuh panyewa kabonnya koa, lalu nyarahatn kabonnya koa ka' panyewa-panyewa nang lain. ¹⁰ Kita' tantunya dah maca ayat nian ka' dalapm Kitap Suci:

‘Batu nang ditukang bangunan anggap ina' baguna
dah jaji batu dasar nang paling penting.

¹¹ Hal koalah nang jaji dari pihak Allah,
nang manjawat diri' kaheranan.’ ”

¹² Lalu pamimpin-pamimpin agama Yahudi barusaha untu' nangkap Yesus tagal ia ka' koa nau'an, kade' parumpamaan koa Yesus nujuatn ka' ia ka' koa. Tapi ia ka' koa gali' ka' urakng rami, jaji ia ka' koa badariatn, ninggalatn Yesus.

Tentang mayar pajak ka' Kaisar

(*Mat. 22:15-22; Luk. 20:20-26*)

¹³ Laka' koa basangahe urakng Parisi man golongan Herodes dinyuruh ampus ka' Yesus untu' nipua'nya man pertanyaan.

¹⁴ Jaji urakng-urakng ka' koa bakata ka' Yesus, “Pa' Guru, kami

12:10 Masmur 118, 22-23 **12:10** *Batu nang ditukang bangunan anggap ina' baguna:* Batu nang dianggap ina' baguna, Ia koa Yesus, nang dinolak man dimunuh di pamimpin-pamimpin Yahudi. Ia mati tapi Allah ngidupatn Ia agi' man nyadiatn Ia baguna untu' diri' umat Allah nang baharu.

nau'an kade' sigana nang di Kita' ngajaratn sidi banar. Kita' ina' paduli ka' kata urakng lain tagal Kita' ngomong ina' batele' muha. Man Kita' ngajaratn nang jujur lea mae urakng arus idup pas man parentah Allah. Jaji padahatn ka' kami, kade' nurut paraturan agama, mulih ato ina' diri' mayar pajak ka' Kaisar, kapala' pamarentah Roma?"¹⁵ Tapi Yesus nau'an kade' ia ka' koa batujuan jahat batanya' lea koa. Tagal koa Yesus bakata, "Ngahe kita' nyobai' aku? Incakng dian duit perak koa biar ku tele!"¹⁶ Jaji ia ka' koa mare'atn sakapikng duit perak ka' Ia. Lalu Yesus batanya', "Gambar man dama sae ke' nian?" Sahut nya ka' koa, "Kaisar."

¹⁷ Jakata Yesus ka' ia ka' koa, "Kade' lea koa, bare'lah ka' Kaisar ahe nang di Kaisar ngampu', man bare'lah ka' Allah ahe nang di Allah ngampu'." Ia ka' koa pun kaheheranan ka' sahut Yesus.

Pertanyaan urakng Saduki tentang urakng mati mulakng idup

(Mat. 22:23-33; Luk. 20:27-40)

¹⁸ Sangahe urakng golongan Saduki atakng ka' Yesus. Golongan urakng Saduki koa ina' pucaya' kade' urakng mati mulaknga' idup agi'. Ia ka' koa batanya' ka' Yesus. ¹⁹ "Pa' Guru, Musa nyonteng ukum nian untu' diri' taati', 'Kade' saurakng nanglaki mati man ia ina' baranak man bininya, jaji sodaranya arus panganten man jandanya koa. Biar mare' katurunan ka' sodaranya nang dah mati koa.' ²⁰ Saandainya ada tujuh urakng

adi' baradi'. Nang tuha panganten lalu mati na' bakaturunan. ²¹ Lalu nang kadua panganten man jandanya koa, man ia pun mati ina' bakaturunan uga' lea koa uga' nang katalu. ²² Man lea koa uga' satarusnya, sampe man nang katujuh ina' uga' bakaturunan. Ahirnya nangbini koa pun mati uga'. ²³ Jaji katujuh adi' baradi'nya koa dah panganten man nangbini koa. Kade' lea koa, taka' urakng-urakng mati na'e mulakng idup agi' sae ka' antara katujuh adi' baradi' koa tadi nang jajia' laki nangbini koa?" ²⁴ Jakata Yesus nyahuti'nya, "Kita' sasat, justru tagal kita' ina' ngarati ka' Kitap Suci mao' pun kuasa Allah. ²⁵ Tagal urakng nang mati mulakng idup ina' panganten man ina' di pangantenan tapi idup lea malaekat ka' saruga. ²⁶ Lea koa uga' urakng-urakng nang mulakng idup dari kamatiatn. Nana' ke' kita' maca ka' dalapm kitap nabi Musa? Ka' dalapm gesah rompo' nang nyala koa, Allah bakata, 'Akulah Allah nang di Abraham nyambah, nang di Isak nyambah, man nang di Yakup nyambah.' ²⁷ Allah koa buke'lah Allah untu' urakng mati, tapi Allah untu' urakng-urakng nang idup. Kita' banar-banar sasat!"

Ukum nang paling penting

(Mat. 22:34-40; Luk. 10:25-28)

²⁸ Lalu saurakng guru agama Yahudi nangngar Yesus man urakng-urakng Saduki baso'al jawab, ia nau'an kade' Yesus mare' jawapan nang banar ka' urakng-urakng koa, jaji guru agama koa notok-Nya man batanya', "Ukum nang mae ke' nang paling penting dari samua ukum?" ²⁹ Sahut Yesus, "Nianlah

ukum nang paling penting, Dangngarlah o urakng Israel, Allah diri' koa tunggal. ³⁰ Kasihi'lah Allahnyu, man sigana atinyu man sigana jiwanyu, man sigana akalnyu man sigana kakuatannyu. ³¹ Ukum nang kadua koa, Kasihi' sabayaatnnyu talino, lea kao ngasihi' diri'nyu babaro. Ina' ada ukum lain nang labih penting dari pada ka' kadua ukum nian.” ³² Lalu guru agama Yahudi koa nyahuti' Yesus, “Batol kata Kita' Pa' Guru, Allah diri' tunggal, ingka' ina' nang lain kacoali Ia ihan. ³³ Memang talino arus ngasihi' Allah man sigana ati man pangaratian man kakuatan, man uga' ngasihi' sabaya talino lea diri' babaro. Koa jauh labih penting daripada paremahan nang dinunu man paremahan nang lainnya, untu' diparemahan ka' Allah.” ³⁴ Yesus nele' lemae bijaksananya sahut urakng koa, lalu kata-Nya ka' urakng koa, “Kao ina' jauh dari Kerajaan Allah!” Man saurakng pun ina' barani agi' batanya' ka' Yesus.

Yesus labih bakuasa dari raja Daut

(Mat. 22:41-46; Luk. 20:41-44)

³⁵ Ka' sote' ari taka' Yesus ngajar ka' Rumah Allah , Ia bakata, “Lea mae guru-guru agama baya ngataatn, kade' Raja Panyalamat koa katurunan raja Daut? ³⁶ Daut babaro di Roh Kudus mimpin man bakata,

‘Tuhan dah bapirman ka' Tuanku:

duduk ka' sabalah kanan-Ku

sampe Aku manjawat munsuh-munsuh-Nyu

tunduk ka' Kao.’

³⁷ Jaji kade' Daut nyabut Raja Panyalamat koa Tuannya, lemae Ia jaji katurunan Daut?" Urakng rami nang nangngar-Nya sidi suka.

Yesus nasehati' biar ati-ati ka' guru agama Yahudi

(Mat. 23:5-7; Luk. 20:45-47)

³⁸ Ka' dalapm pangajaran-Nya Yesus bakata, "Ati-atilah ka' guru agama Yahudi nang suka bajalatn-jalatn make jubah nang panyakng man suka dihormati' ka' pasar-pasar. ³⁹ Ia ka' koa suka tempat nang ka' depan ka' tempat tahormat rumah sumbayang man ka' gawe-gawe. ⁴⁰ Ia ka' koa nipu janda-janda man ngarampas rumahnya. Untu' nutupi' kajahatatnya, ia ka' koa bado'a lama! Tapi ia ka' koa bapura'-pura' ihan. Tagal koa Allah pasti ngukum ia ka' koa lebih barat."

Persembahan saurakng janda miskin

(Luk. 21:1-4)

⁴¹ Ka' teras Rumah Kudus Allah Yesus duduk ngadapi' kotak tempat mare' persembahan, Ia maratiatnni' urakng-urakng nama'an duit ka' dalapm tempat persembahan koa. Urakng kaya ka' koa mare' banyak duitnya untu' persembahan. ⁴² Ia nele' uga' saurakng janda kodo nama'an dua kapikng duit nang nilainya miah damuk ka' dalapm tempat persembahan koa. ⁴³ Lalu Yesus nyaru' murit-murit-Nya man bakata, "Dangngar boh, sabatolnya janda kodo nian mare' jauh lebih banyak dari pada sigana

urakng-urakng ka' kea. ⁴⁴Tagal urakng ka' kea mare' man haratanya nang dah labih. Biarpun ia ina' bakaheatn tapi janda nang miah kodo nian, mare' man ahe nang ada ka' diri'nya.”

Rumah Kudus Allah dirobohhatna'

(*Mat. 24:1-2; Luk. 21:5-6*)

13 Taka' Yesus kaluar dari Rumah Allah , saurakng dari murit-murit-Nya bakata ka' Ia, “Pa' Guru, tele' lah sisi edo'nya Rumah Kudus Allah nian! Sidi aya'-aya' batunya.”² Lalu Yesus bakata ka' ia koa, “Ahe nang kita' tele' di'koa, atakngnga' arinya, sote' batu pun ina' agi' tasusutn ka' tempatnya. Sigananya koa diluruhatna'.”³ Taka' Yesus babaro duduk ka' atas bukit Jaitun, baradapatn man Rumah Allah . Petrus, Yakobus, Yohanes man Andreas atakng ka' Ia man batanya',⁴ “Coba Kita' padahatn ka' kami, kamule man ahe tandanya kade' sigana'nya koa tajajia'?”

⁵ Jakata Yesus ka' ia ka' koa. “Ati-ati boh ame ada urakng nang nyasatatn kita'!”⁶ Barang rami urakng atakngnga' make dama-Ku man bakata: Aku ihan Raja Panyalamat koa man ia ka' koa nyasatatnna' rami urakng. ⁷ Man kade' kita' nangngar urakng-urakng gi' baparang, gesah-gesah tentang parang, ame kita' gulinsah. Tapi samuanya koa arus tajaji dolo' buke' barati sigananya koa dah atakng wa'tunya pangabisatn dunia. ⁸ Ada agi' tajajia' bangsa baparanga' man bangsa, nagari baparanga' man nagari. Man uga' ka' maea' ma'an jajia' gempa ai' tanah nang kuat man kaparatn. Rati sigananya koa baru' pamula'atn

kasingsaraatn nang jadia'. Koa sama lea nangbini nang baru' mulai' sakit wa'tu baranakka'

⁹Tapi kita' nian ati-ati boh! Kita' disarahatnna' ka' majelis agama untu' diadili' man kita' uga' di pangkongia' ka' rumah tempat sumbayang man kita' diadapatnna' ka' depan panguasa-panguasa man raja-raja tagal nuna'an Aku. Tapi koalah kasampatan kita' untu' jaji saksi-Ku ka' ia ka' koa. ¹⁰Tapi sanape' pangabisatn dunia, Kabar Baik arus digesahatn dolo' ka' sigana bangsa. ¹¹Taka' kita' ditangkap man di adilia' kita' ame kuatir ka' ahe nang arus kita' kataatn. Tapi kataatnlah ahe nang di Roh Kudus madahatn ka' kita' wa'tu koa. Sabatolnya buke' kita' babaro nang ngataatnnya koa tapi Roh Kudus Allah.

¹²Adaa' urakng nang nyarahatnna' sodaranya nang lain untu' dibunuh, lea koa uga' apa' man anaknya. Man kamuda'-kamuda' ngalawanna' apa' uwe'nya. Man uga' nyarahatnna'nya ka' koa untu' dibunuh. ¹³Kita' disigana talino tegetatnna' tagal nuna'an Aku. Tapi kade' kita' bataan sampe ka' pangabisatnnya kita' salamata'."

Siksaan nang barat man karistus-karistus palsu

(Mat. 24:15-28; Luk. 21:20-24)

¹⁴Lalu Yesus bakata agi', "Kita' nele'a' saurakng nang paling jahat nang di Allah negetatn. Urakng koa badiria' man ngotori' tempat nang ina' mulih dinya tama'i'. (Nang maca nian arus ngarati hal nian baik-baik.) Ka' wa'tu koa urakng-urakng ka' Yudea arus badariatn ka' da'erah nang babukit. ¹⁵Urakng nang

ada ka' atap, ame ia turutn man tama' ka' dalapm rumah naap barangnya. ¹⁶ Man urakng nang ada ka' umanya ame lah pulakng naap pakeannya. ¹⁷ Sidi singsara uwe'-uwe' nang tagah babuntikng man nang gi' nyusu'i' anaknya ka' ari koa. ¹⁸ Bado'a boh, biar kasusahatn koa ame tajaji ka' wa'tu musim dingin. ¹⁹ Aku bakata lea koa, tagal ka' wa'tu koa urakng-urakng sidi singsaraa'. Urakng gi' ina' suah ngalami' kasingsaraatn nang sidi miah koa dari pamula'atn Allah nampa' langit man ai' tanah sampe ampeatn. Ka' na'e nya uga' pun urakng ina' singsaraa' lea koa agi'. ²⁰ Kade' wa'tu kasingsaraatn koa ina' di Allah batasi', ina' ada urakng nang salamata'. Tapi tagal Allah ngasihi' umatnya nang Nya-milih, Ia maponok wa'tu kasingsaraatn koa.

²¹ Ka' ari koa kade' ada urakng nang bakata ka' kita': Tele', Raja Panyalamat ada ka' dian, ato: Tele', Raja Panyalamat ada ka' naun ame kita' pucaya' ²² tagal panyalamat-panyalamat palsu man nabi-nabi palsu atakngnga'. Ia ka' koa manjawata' tanda man hal-hal ajaip bamaksut, kade' mungkin ia ka' koa nyasatatnna' urakng nang dah di Allah milih jaji umat-Nya. ²³ Ati-ati boh kita'! Aku dah labih dolo' madahatn sigananya nian ka' kita'."

Kaatangan Anak Manunsia - Parumpamaan tentang puhutn ara'

(Mat. 24:29-36; Luk. 21:25-33)

²⁴ "Dah laka' jaman kasusahatn koa, mataari jajia' patakng, bulatn ina' agi' basaho. ²⁵ Man bintakng-bintakng bajantuatna'

mpat ka' langit, man kuasa-kuasa langit bagoncang.²⁶ Ka' wa'tu koa urakng nele'a', Anak Manunsia atakngnga' man rahu' man kuasa nang miah tingi man uga' basaho nang miah tarakng.²⁷ Ka' wa'tu koa uga' Allah nyuruha' malaekat-malaekat-Nya kaluas man ngomo'an sigana urakng-urakng pilihan-Nya ka' ampat panjuru ai' tanah, dari ujukng ai' tanah sampe ka' ujukng langit.

²⁸Palajari'lah parumpamaan tentang puhutn ara'. Kade' dah mulai' batarok ka' ujukng dahatnnya nang lamut koa, kita' nau'an kade' wa'tu musim darakng dah samak.²⁹ Lea koa uga' kade' kita' nele' wa'tu kasingsaraatn nang sidi parah koa jadi, rati tandanya koa wa'tu kaatangan Anak Manunsia dah miah samak.³⁰ Aku bakata ka' kita', Sabatolnya hal-hal nian pasti tajajia' dolo', sanape' urakng-urakng nang idup ampeatn mati samuanya.³¹ Langit man ai' tanah abisa', tapi pakataatn-Ku tatap salama-lamanya.

³²Tapi tentang ari ato wa'tu koa ina' saurakngpun nang nau'anna', malaekat-malaekat ka' saruga pun ina', bahkan Anak pun ina' uga' nau'an cuman Apa' ihan nang nau'an.”

Nasehat biar bajaga-jaga

³³“Basiap-siap man bajaga-jagalah! Tagal kita' ina' nau'an kamile wa'tunya tajajia'.³⁴ Tagal kaadaannya koa lea urakng nang ninggalatn rumahnya ampus bajalatn ka' nagari nang jauh. Ia mare'atn tanggong jawab kana' amba ulutnnya, masing-masing man tugasnya, man ka' panjaga-panjaga pintu biar bajaga-jaga.³⁵ Tagal koa basiap-siap man bajaga-jagalah,

kita' ina' nau'an kamile ampu' rumah koa pulakng, antah barage gumare', tengah malam, dini ari, ato miah alapm sidi. ³⁶ Kade' ia atakng tiba-tiba, amelah sampe ia namusi' kita' tagah tidur. ³⁷ Ahe nang Ku ngataatn nian ka' kita', Ku ngataatn uga' ka' sigana urakng, taruslah bajaga-bajaga!”

Rencana untu' munuh Yesus

(Mat. 26:1-5; Luk. 22:1-2; Yoh. 11:45-53)

14 Dua ari agi' gawe Paska man Gawe Roti Ina' Baragi mulai'a'. Imam-imam kapala' man guru-guru agama Yahudi, diam-diam gi' tagah bagago' maraga ampahе cara nangkap man munuh Yesus. ² Tapi jakatanya ka' koa, “Ame diri' manjawat hal koa wa'tu gawe, biar na'e ame timul uru-ara.”

Yesus diurapi'

(Mat. 26:6-13; Yoh. 12:1-8)

³ Taka' Yesus ada ka' Betania, Ia diapm ka' rumah Simon nang de'nya suah kana panyakit bangkakng. Taka' Yesus duduk makatn, ada saurakng nangbini atakng ngincakng botol nang tabuat dari batu putih nang barisi' binyak narwastu tolen nang raganya miah mahal. Laka' koa nya macahatn tage' botol koa, lalu nontongan binyak koa ka' atas kapala Yesus. ⁴ Basangahe urakng nang ada di'koa jaji bera man bakata ka' sabayaatnnya, “Ahe gunanya binyak wangi nian di ngosa-ngosa? ⁵ Kade' binyak koa baya dijual man raga talu ratus duit perak lebih

man duitnya baya dibare'atn ka' urakng kodo!” Jaji ia ka' koa meraatn nangbini koa. ⁶Tapi Yesus bakata ka' urakng-urakng koa, “Badiapmlah ame bera ka' ia. Ahe nang ia manjawat ka' Aku koa sidi edo'. ⁷Kade' urakng-urakng kodo ada ma'an man kita', kamule ja' kita' baya manto'nya, tapi kade' Aku ina' gia adaa' ma'an man kita'. ⁸Nangbini nian dah manjawat ahe nang baya di nya panjawat. Man binyak wangi nian ia dah nyiapatn untu' nyubura' Aku sanape' wa'tunya. ⁹Aku bakata ka' kita', sabatolnya ka' mae ma'an Kabar Baik digesahatn ka' sigana ai' tanah, ahe nang di nangbini nian manjawat ka' Aku digesahatnna' uga' untu' ngingatnya.”

Yudas Iskariot ngianati' Yesus

14:10-11

¹⁰Lalu Yudas Iskariot, saurakng dari kaduabalas murid Yesus, ampus ka' imam-imam kapala' bamaksut nyarahatna' Yesus ka' ia ka' koa. ¹¹Imam-imam kapala' koa sidi karepoatn nangngar hal koa, man bajanji mare'a' Yudas duit. Laka' koa Yudas ngago' wa'tu nang baik untu' nyarahatna' Yesus.

Yesus makatn Paska man murid-murit-Nya

(Mat. 26:17-25; Luk. 22:7-14, 21-23; Yoh. 13:21-30)

¹²Ka' ari pamula'atn gawe Roti Ina' Baragi, wa'tu urakng nyambaleh domba Paska, murid-murit-Nya batanya' ka' Yesus, “Guru, dimae' ke' tempat nang kita' mao'i', biar kami ampus

nyiapatn jamuan Paska?”¹³ Lalu Yesus nyuruh dua urakng murid-Nya, jakata-Nya, “Ampuslah ka' kota, na'e kita' batamua' man saurakng nanglaki, nang gi' tagah ngincakng sabuah tapayatn barisi ai'. Tuna'anlah ia,¹⁴ ka' rumah nang dinya nama'i' man batanya'lah ka' ampu' rumah koa, Pa' Guru nyuruh kami batanya' ka' kita', ‘Di'mae ke' tempatnya untu' Aku man murid-murid-Ku makatnna' Paska?’¹⁵ Ampu' rumah koa nojokatnna' ka' kita' sami' ka' loteng nang aya', nang dah langkap man meja man pakakas lainnya. Siapatnlah sigananya koa ka' naun.”¹⁶ Lalu berangkatlah kadua murid koa, wa'tu sampe ka' kota, di koa ia ka' koa nele' sigananya pas lea nang di Yesus ngomongan. Ia ka' koapun nyiapatn makanan untu' Paska.

¹⁷Taka' dah malam ari, Yesus man kaduabalas murid-Nya atakng ka' tempat koa.¹⁸ Taka' ia ka' koa badudukatn tagah makatn, Yesus bakata, “Aku bakata ka' kita', sabatolnya ka' antara kita' nian ada saurakng nang nyarahatnna' Aku, ia koa ada makatn man Aku.”¹⁹ Taka' nangngar kata Yesus koa, atinya ka' koa sidi kasal, seko'-seko' ia ka' koa bakata ka' Yesus, “Buke' boh aku, Tuhan?”²⁰ Lalu sahut Yesus, “Saurakng ka' antara kita' nang kaduabalas nian ia nang nyecelatn rotinya ka' dalapm mangkok man Aku.”²¹ Memang Anak Manunsia matia' lea nang dinyontengan ka' dalapm Kitap Suci. Tapi sidi cilakalah urakng nang ngianati' Anak Manunsia koa! Labih baik untu' urakng koa kade' ia ina' suah diparanakatn.”

Perjamuan Tuhan

(*Mat. 26:26-29; Luk. 22:15-20; 1Kor. 11:23-25*)

²² Taka' Yesus man murid-murit-Nya bamakanan, Yesus naap roti, ngucapatn do'a sukur, laka' koa Ia nyempak-nyempak roti lalu mare'atnya kana' murid-murit-Nya. Jakata-Nya, “Taaplah roti nian makatnlah, nian boh tubuh-Ku.” ²³ Laka' koa Yesus naap cawan ngucap sukur lalu mare'atnnya ka' murid-muritnya, man ia ka' koa samuanya nyocok dari cawan koa ²⁴ Laka' koa Yesus bakata ka' ia ka' koa, “Nian boh darah-Ku, darah nian jaji tanda janji baharu Allah man talino. Darah nian dinontongan untu' nyalamatatn urakng rami. ²⁵ Dangngar boh, mulai' ampeatn Aku ina' nyocoka' ai' anggur nian agi', sampe ka' wa'tu Aku nyocok ai' anggur nang baharu ka' dalapm Karajaan Allah.”

Petrus nyangkala' Yesus

(*Mat. 26:30-35; Luk. 22:31-34; Yoh. 13:36-38*)

²⁶ Laka' koa, ia ka' koa barenyah man puji-pujian, lalu ia ka' koa ampus ka' Bukit Jaitun.

²⁷ Ka' pajalanan Yesus bakata ka' ia ka' koa, “Malam nian uga' kita' barantia' pucaya' ka' Aku man ningalatnna' Aku. Tagal ada ta'conteng ka' dalapm kitab suci, ‘Aku mangkonga' panjaga domba, man domba-dombanya badariatnna'.’ ²⁸ Laka' koa Aku mulakng idup agi', man nyintolo'ia' kita' ka' Galilea.” ²⁹ Kata Petrus ka' Yesus, “Biarpun ia ka' koa ninggalatn Kita', tapi aku

ina”³⁰ Yesus bakata ka' Petrus, “Aku bakata ka' kao, sabatolnya ari nian malam nian uga', sanape' manok ningko'ok dua kali kao dah talu kali nyangkal Aku.”³¹ Tapi batol-batol Petrus nyahut, “Biar ampahepun aku ina' nyangkala' Kita', aku siap mati man Kita'.” Nang lain bakata lea koa uga'.

Ka' taman Getsemani

(Mat. 26:36-46; Luk. 22:39-46)

³² Lalu Yesus man murid-murit-Nya ampus ka' tempat nang badama taman Getsemani, jakata Yesus ka' murid-murit-Nya, “Duduk boh dian, Aku bado'aa' dolo'.”³³ Yesus ngincakng na' Petrus, Yakobus man Yohanes. Ia sidi gali' man miah barat ati,³⁴ Yesus bakata ka' ia ka' koa, “Ati-Ku miah kasal, lea matia' rasanya. Badiapm dolo' kita' ka' dian man bajaga.”³⁵ Yesus bajalatn sabebet ka' depan lalu Ia ngahurapm ka' tanah man bado'a. Ka' dalapm do'a-Nya koa Ia bapinta' biar kade' baya Ia lapas dari kasingsaraatn koa.³⁶ Do'a Yesus, jakata-Nya, “O Pa', pa' na' ada nang ina' baya di Kita' panjawat. Kade' mulih lapasatn Aku dari kasingsaraatn arus nang Ku adapi' nian, tapi ame lah kamao'an-Ku nang jaji kahe biarlah kamao'an Kita' nang jadi.”

³⁷ Laka' Yesus bado'a, Ia atakng agi' kana' murid-murit-Nya man napati' ia ka' koa tagah tatidur. Lalu Ia bakata ka' Petrus, “Simon, tidur ke' kao? Nana' ke' kao mampu bajaga sajam ihan?”³⁸ Lalu kata Yesus agi', “Ame tidur. Bado'alah biar ame kita' tapangaruh untu' manjawat dosa, rohnyu ingka' nurut, tapi tubuhnya lemah.”³⁹ Lalu Yesus ampus agi' ngomongan do'a

nang sama lea nang tadi. ⁴⁰ Laka' bado'a, Ia mulakng agi' man nele' ayungannya batiduratn agi' tagal matanya ka' koa sidi dah miah redo. Nyatalu koa sidi kasupe'atn man ina' baya bakata ahe-ahe ka' Yesus.

⁴¹ Laka' koa Yesus ampus agi' bado'a katalu kalinya, laka' Ia bado'a Yesus mulakng agi' ka' murid-murit-Nya, lalu bakata, “Kita' masih uga' tidur? Cukuplah! Dah namus wa'tunya Anak Manunsia disarahatnna' ka' kokot urakng-urakng badosa. ⁴² Lumpatlah, inje' diri' ampus. Tele' urakng nang nyarahatn Aku dah atakng.”

Yesus dinangkap

(Mat. 26:47-56; Luk. 22:47-53; Yoh. 18:1-11)

⁴³ Taka' Yesus gi' ngomong, ataknglah sarombongan urakng. Yudas, saurakng dari kaduabalas murid Yesus, mimpin rombongan koa. Ia ka' koa ngincakng pedang man pamangkong tagal disuruh imam-imam kapala', guru-guru Agama, man pamimpin Yahudi untu' nangkap Yesus. ⁴⁴ Yudas, nang nyarahatn Yesus koa, dah madahatn tanda nian ka' ia ka' koa, “Urakng nang ku ngidung koalah Yesus. Tangkap man incakng Ia dijaga batol-batol.” ⁴⁵ Taka' ia sampe di koa, ia langsung ampus ka' Yesus man bakata, “Pa' Guru!” Laka' koa ia ngidung Yesus. ⁴⁶ Lalu urakng-urakng nang barage atakng man Yudas koa nangkap Yesus man ngikat-Nya. ⁴⁷ Lalu ada saurakng murid Yesus mabut pedangnya man nyarang amba ulutn Imam Agung koa. Ia natak putus sote' tarenyekngnya.

⁴⁸ Kata Yesus ka' ia ka' koa, “Kita' kira Aku nian panjahat ke', sampe-sampe kita' atakng incakng pedang man pamangkong untu' nangkap aku? ⁴⁹ Miakng ari Aku ngajar ka' Rumah Kudus Allah ka' adapatn kita', ngahe' kita' bai' nangkap Aku ka' naun? Tapi ingka' ahe nang dah taconteng ka' dalapm Kitap Suci arus ditapati.’”

⁵⁰ Wa'tu koa samua murid-Nya ninggalatn Yesus.

⁵¹ Tapi ada saurakng nang bujakng nuna'an Yesus, ia cuman make pakean sabalah ihan. Urakng ka' koa nangkapa'nya lalu narik pakeannya ⁵² Tapi nang bujakng koa dari sambil ngalapasatn pakeannya, lalu batalama' ina' bapakean.

Yesus ka' adapatn Sidang Agama Yahudi

(Mat. 26:57-68; Luk. 22:54-55, 63-71; Yoh. 18:12-14, 19-24)

⁵³ Laka' koa Yesus di ngincakng ngadap ka' Imam Agung. Lalu sigana imam kapala', pamimpin Yahudi man guru agama Yahudi bakomo' di'koa. ⁵⁴ Petrus nuna'i' Yesus dari jauh, taka' Petrus nyampe ka' alaman rumah Imam Agung koa, ada api nang dah dimarungkutn, man pangawal-pangawal gi' duduk ka' sakulilingannya untu' ngangati' tubuh, Petrus uga' ampus duduk sama-sama man ia ka' koa.

⁵⁵ Imam-imam kapala', man Sidang Agama barusaha muktiatn kade' Yesus basalah biar Yesus koa baya di ukum mati tapi ia ka' koa sabebetpun ina' namu bukti. ⁵⁶ Ada rami urakng nang mare' kesaksian nang alok ka' Yesus, tapi kesaksiannya ka' koa batantangan seko' man nang lainnya. ⁵⁷ Lalu sangahe

urakng badiri man mare' kesaksian nang alok lea nian, ⁵⁸ “Kami nangngar urakng nian bakata: ‘Aku mongkara' Rumah Kudus Allah nang di talino manjawat man kokotnya, man salama talu ari numukatn nang baru nang buke' talino manjawatnya.’ ”
⁵⁹ Tapi kesaksian koa uga' batantangan seko' man nang lainnya.

⁶⁰ Lalu Imam Agung badiri ka' adapatn ia ka' koa man batanya' ka' Yesus katanya, “Ngahe kita' bai' nyahut ka' sigana tuduhan nang barat ka' kita' koa?” ⁶¹ Tapi Yesus badiapm ma'an ina' nyahut sapatah katapun. Imam Agung koa batanya' ka' Yesus sakali agi', jakatanya, “Ahe ke' Kita' Raja Panyalamat, Anak Allah nang Mahakuasa?” ⁶² Sahut Yesus, “Au' ingka' banar. Kita' nele'a' Aku anak Manunsia, duduk ka' tempat nang paling tahormat ka' samping nang Mahakuasa man atakng ka' tengah-tengah rahu' dari langit.” ⁶³ Imam Agung nangngar kata Yesus koa, lalu ia ngarantak baju nang nya make koa, man bakata, “Ina' palalu agi' saksi, barang diri' dah nangngar dari molot-Nya babaro! ⁶⁴ Kita' babaro dah nangngar Ia ngina Allah. Lea mae pendapat kita'?” Lalu ia ka' koa samuanya mutusatn kade' Yesus basalah, man patut diukum mati. ⁶⁵ Lalu sangahe urakng mulai' ngalujahi' Yesus, man nutup mata-Nya sambil ninju-Nya man bakata ka' Ia, “O nabi, coba taba' sae nang ninju kita'?” Pangawal-pangawal uga' nampari' Yesus.

Petrus nyangkal Yesus

(*Mat. 26:69-75; Luk. 22:56-62; Yoh. 18:15-18, 25-27*)

⁶⁶ Wa'tu koa Petrus masih ka' alaman rumah Imam Agung koa. Lalu atakng palayan nangbini Imam Agung koa ka' di koa. ⁶⁷ Ia maratiatnni' Petrus ka' tarakng api koa, amba ulutn koa bakata, “Ina' ke' kao nian murid Yesus urakng Nasaret koa?” ⁶⁸ Tapi Petrus bai' ngakoi'nya man bakata, “Aku ina' nau'an man ina' ngarati ka' ahe nang nyu maksut.” Lalu Petrus ampus ka' pintu gerbang rumah Imam Agung koa. Wa'tu koa uga' manok ningko'ok. ⁶⁹ Palayan nangbini koa tatele' agi' ka' Petrus lalu bakata ka' urakng-urakng nang ada di'koa, “Ia nian ingka' murid Yesus.” ⁷⁰ Tapi Petrus basangkal agi', “Buke' aku!” Ina' lama laka' koa uga' urakng-urakng nang ka' di'koa bakata ka' Petrus, “Kita' nian pasti salah saurakng dari ia ka' koa, ahe agi' kita' urakng Galilea.” ⁷¹ Lalu Petrus mulai' basumpah-sumpah, “Aku ina' kanal ka' urakng koa! Kade' aku alok, biarlah Tuhan nang ka' saruga ngukum aku!” ⁷² Wa'tu koa uga' manok ningko'ok kadua kalinya. Petrus taringat ka' ahe nang dah di Yesus ngataatn ka' ia de'e, “Sanape' manok ningko'ok dua kali, kao dah nyangkal Aku talu kali.” Lalu Petrus pun ngeak sampe sikal.

Yesus ka' adapatn Pilatus

(*Mat. 27:1-2, 11-26; Luk. 23:1-5, 13-25; Yoh. 18:28–19:16*)

15 Alapm arinya imam-imam kapala' man sigana pamimpin Yahudi, guru-guru agama man sigana

Sidang Agama dah bolat pakatnya. Ia ka' koa ngikat Yesus lalu ngincakng-Nya man nyarahatn-Nya ka' Pilatus gubernur nagari Roma. ²Pilatus batanya' ka' Yesus, “Kita' ke' raja urakng Yahudi?” Sahut Yesus, “Lea koa jakata kita!” ³Lalu imam-imam kapala' ngalaporatn banyak tuduhatn kasalahatn tentang Yesus. ⁴Pilatus batanya' agi' ka' Yesus jakatanya, “Nana' ke' Kita' pane nyahut? Dangngar banyak sidi nang dinuduhatn ka' Kita!” ⁵Tapi Yesus sidi bai' nyahut, sampe-sampe Pilatus sidi heran.

⁶Tiap tahutn ari raya Paska ka' Yerusalem, ada kabiasaan ngalapasatn saurakng tahanan nuruti' kamao'an masarakat. ⁷Ka' dalapm pinjara, ka' antara pambarontak-pambarontak nang manjawat pambunuhan ka' wa'tu karusuhan, ada saurakng badama Barabas. ⁸Lalu urakng rami atakng man minta' ka' Pilatus biar ia ngalapasatn saurakng tahanan lea biasanya. ⁹Pilatus batanya' ka' ia ka' koa, “Mao' ke' kita' kade' aku ngalapasatn raja urakng Yahudi nian?” ¹⁰Tagal Pilatus dah nau'an kade' imam-imam kapala' nyarahatn Yesus koa ka' ia tagal rusi' ati. ¹¹Tapi imam-imam kapala' ngasut urakng rami minta' ka' Pilatus kade' Barabas dibebasatn untu' ia ka' koa, buke'nya Yesus. ¹²Lalu Pilatus batanya' agi' ka' ia ka' koa, “Kade' lea koa, ahe nang ku panjawata' ka' Yesus nang di kita' nyabut raja urakng Yahudi nian?” ¹³Tagal koa ia ka' koa bangampakatn agi', jakatanya, “Salipatn Ia!” ¹⁴Lalu Pilatus batanya' ka' ia ka' koa, “Tapi ahe ke' kajahatan-Nya?” Lalu ia ka' koa sia' miah bangampakatn, “Salipatn ma'an Ia!” ¹⁵Tagal Pilatus mao' ngarepoatna' ati urakng rami koa, ia mebasatn

Barabas untu' ia ka' koa. Laka' koa Yesus dinyambuk lalu dinyarahatn untu' disalipatn.

Yesus dingolo'-ngolo'

(Mat. 27:27-31; Yoh. 19:2-3)

¹⁶Jaji tantara-tantara ka' koa ngincakng Yesus tama' ka' sami' tempat sidang pengadilan ka' dalapm istana. Lalu dinyaru' samua tantara koa biar bakomo' di' koa. ¹⁷Yesus dimare' jubah ungu dimakeatn ka' tubuh-Nya, lalu tantara-tantara ka' koa nganyam mahkota duri man dimakeatn ka' kapala-Nya. ¹⁸Laka' koa ia ka' koa bapura'-pura' hormat ka' Yesus, jakatanya, “Salam, O raja urakng Yahudi!” ¹⁹Ia ka' koa mangkongi' kapala-Nya man buluh, uga' ngalujahi'-Nya man balutut nyambah-Nya. ^{20a}Laka' ngolo'-ngolo' Yesus, ia ka' koa muka' jubah ungu ka' tubuh-Nya, lalu makeatn agi' baju-Nya.

Yesus dinyalip

(Mat. 27:32-44; Luk. 23:26, 33-43; Yoh. 19:17-24)

^{20b}Lalu Yesus dingincakng kaluas untu' disalipatn. ²¹Taka' ia ka' koa tagah bajalatn, ia ka' koa batamu man saurakng badama Simon apa' Aleksander man Rupus dari desa Kirene, ia baru' atakng dari luar kota. Tantara Roma koa maksa Simon mikut kayu salip Yesus.

²²Ia ka' koa ngincakng Yesus ka' tempat nang badama Golgota, nang ratinya, Tempat Tangkora'. ²³Lalu ia ka' koa

mare' anggur bacampur gatah puhutn mur ka' Yesus, tapi Ia bai' nyocoknya. ²⁴Laka' koa ia ka' koa nyalipatn Yesus, lalu baundi untu' nantuatn sae-sae ja' nang namua' pakean-Nya.

²⁵Yesus dinyalipatn jam sambilan alapm. ²⁶Ka' atas kayu salip-Nya dimakulatn satatak papatn nang batulisan, “Raja Urakng Yahudi alasan Ia dingukum.”

²⁷Ia ka' koa uga' nyalipatn dua urakng parampok barage man Yesus, saurakng ka' sabalah kanan-Nya man saurakng agi' ka' sabalah keba'-Nya [²⁸Lea koalah ganap ayat Kitap Suci nang babunyi, “Yesus koa masok etongan ka' antara panjahat-panjahat.”]

²⁹Urakng-urakng nang lewat di'koa ngina-Nya, man sambil mageleng kapala ia ka' koa bakata, “O Kita' nang mao' ngarobohatnna' Rumah Kudus Allah dalapm wa'tu talu ari. ³⁰Coba turutn dari kayu salip koa man salamatatn diri' Kita' babaro!” ³¹Lea koa uga' imam-imam kapala' man guru-guru agama ngolo' Yesus. Ia ka' koa bakata seko' man nang lain, “Ia nyalamatatn urakng lain, tapi Ia ina' baya nyalamatatn diri'-Nya babaro. ³²Kade' Ia banar-banar Karistus Raja Panyalamat, raja bangsa Israel, coba Ia turutn dari kayu salip koa, biar kami nele' man pucaya' ka' Ia!” Kadua urakng nang dinyalipatn man Yesus koa pun ngina Yesus uga'.

Yesus mati

(*Mat. 27:45-56; Luk. 23:44-49; Yoh. 19:28-30*)

³³ Bamula jam dua belas tengah ari, tiba-tiba sigana abut nang ka' tempat koa patakng sampe jam talu gumare'. ³⁴ Ka' jam talu koa Yesus ngampak man suara nang nyaring, “Eloi, Eloi, lama sabakhtani?” Nang ratinya, “Allah-Ku, Allah-Ku ngahe Kita' ningalatn Aku?” ³⁵ Sangahe urakng nang ada badiri di'koa nangngar kampak Yesus koa, lalu bakata, “Dangngar, Ia nyaru' nabi Elia!” ³⁶ Laka' koa saurakng atakng batalama' ngincakng bunga karang, ia make sabatakng buluh di nya nyalupatn ka' dalapm anggur masapm lalu nyolo'atn ka' molot Yesus, man bakata, “Diri' tunggu man nele'nya ahe ke' Elia nurunanna'-Nya dari salib koa.” ³⁷ Lalu Yesus ngampak man suara nang nyarikng Ia mutusatn sengat-Nya. ³⁸ Taka' koa uga' tirai nang bagantukng ka' dalapm Rumah Kudus Allah koa rantak jaji dua dari atas sampe ka' babah. ³⁹ Perwira tantara nang badiri ka' adapatn salib koa, nele' lea mae Yesus mati. Ia bakata, “Sidi banar urakng nian Anak Allah!”

⁴⁰ Ada uga' sangahe urakng nangbini nele' dari jauh, ka' antaranya koa Maria Magdalena, Maria (uwe' Yoses man Yakobus nang gi' muda') man uga' Salome. ⁴¹ Ia ka' koa ingka' dah suah nuna'an Yesus man ngalayani'-Nya wa'tu ka' Galilea. Man rami agi' di'koa nangbini-nangbini lain nang dah atakng ka' Yerusalem barage man Yesus.

Yesus dinyubur

(*Mat. 27:57-61; Luk. 23:50-56; Yoh. 19:38-42*)

⁴² Samintara dah sia' gumare', man ari koa ari persiapana' Sabat ampaginya. ⁴³ Tagal koa saurakng nang badama Yusup, nang asalnya dari kota Arimatea, ia saurakng dari anggota Sidang Agama. Ia urakng nang baik man dihormati' urakng nang gi' tagah nganti'atn arinya Allah bamulaa' marentah jaji Raja. Ia maranian diri'nya ngadap Pilatus minta' mayat Yesus. ⁴⁴ Pilatus heran nangngar kade' Yesus dah mati sanape' malam. Lalu ia nyaru' perwira tantara man batanya' sidi ke' Yesus koa dah mati. ⁴⁵ Laka' Pilatus nangngar laporan perwira tantara koa kade' Yesus koa dah batol mati, Pilatus ngijinan Yusup naap mayat Yesus. ⁴⁶ Yusup pun mali kaen putih dari lenan alus, ia nurunan mayat Yesus dari kayu salip lalu mungkusnya man kaen koa. Lalu ia nguringan Yesus ka' dalapm subur nang dinabot ka' dalapm bukit batu. Laka' koa ia maringkatn batu nutupi' pintu subur koa. ⁴⁷ Maria Makdalena man Maria uwe' Yoses koa nele' uga' lea mae mayat Yesus dingalaka'atn ka' dalapm subur koa.

Yesus mulakng idup dari kamatiatn

(*Mat. 28:1-10; Luk. 24:1-12; Yoh. 20:1-10*)

16 Taka' ari Sabat dah lewat, Maria Makdalena man Maria uwe' Yakobus man Salome mali ramuan-ramuan untu'

15:46 *lenan alus* dimanjawat dari kapas, nang biasa di imam-imam make. (Imamat 6:10)

minyakia' bangke Yesus. ² Alapm-alapm sidi taka' mataari baru' tarabit ka' ari minggu koa, ia ka' koa ampus ka' pasuburatn. ³ Sambil ka' pajalanan ia ka' koa bakata seko' man nang lain, “Sae nang baya manto' diri' maringkatn batu aya' nang jaji panutup subur koa?” ⁴ Tapi taka' ia ka' koa nele' ka' samak subur koa, batu panutup nang aya' koa dah tageser. ⁵ Lalu ia ka' koa tama' ka' dalapm subur koa, ia ka' koa nele' ada saurakng nangbukakng nang bapakean putih duduk ka' sabalah kanan subur koa, ia ka' koa miah takajut. ⁶ Tapi urakng koa bakata ka' ia ka' koa, “Ame gali'! Kita' ngago'i' Yesus urakng Nasaret, nang di nyalipatn koa. Ia dah mulakng idup. Tele'! Nian tempat nya ka' koa nguringan Yesus. ⁷ Tapi ampeatn ampuslah, padahatn ka' murid-murit-Nya man Petrus, Ia nyintolo'ia' kita' ka' Galilea. Di koa kita' nele'a'-Nya, lea ahe nang dah di-Nya madahatn ka' kita'.” ⁸ Lalu nangbini-nangbini ka' koa da' ningalatn subur koa, tagal ia ka' koa sidi kagali'anan. Man ia ka' koa ina' barani bakata ahe-ahe ka' sae pun tagal gali'.

Man baganceh nangbini-nangbini ka' koa nyampeatn samua pasatn koa ka' Petrus man ayungannya. Laka' koa Yesus babaro ngiripm murid-murit-Nya ngesahatn dari timur ka' barat barita nang suci nang pasti jaji tentang kasalamatan nang ina' bakatampusatn koa.

**Yesus sangahe kali madahatn diri'-Nya
man ngiripm murid-murit-Nya**

Yesus tarangkat ka' saruga

16:9-20

[⁹Ari minggu koa, alapm-alapm sidi Yesus dah mulakng idup dari kamatiatn. Mula-mula ia madahatn diri'-Nya ka' Maria Magdalena. Yesus suah ngoser tujuh setan dari nya koa. ¹⁰Lalu nangbini koa ampus bapadah ka' ayungannya, nang suah nuna'an Yesus. Wa'tu koa, ia ka' koa tagah bakanang man ngeaki' Yesus. ¹¹Tapi taka' ia ka' koa nangngar kade' Yesus dah mulakng idup man Maria dah suah nele'-Nya, ia ka' koa ina' pucaya'.

¹²Ina' lama laka' koa Yesus nele'atn diri'-Nya ka' dua urakng pangikut-Nya man cara nang lain, taka' nyadua tagah ka' pajalanan ka' sabuah kampokng. ¹³Lalu nyadua koa mulakng man madahi' ayungannya nang lain tapi ayungannya nang lain koa ina' pucaya' ka' nyadua koa.

¹⁴Ahirnya Yesus nele'atn diri'-Nya ka' kasabalas murid-Nya nang gi' tagah makatn. Yesus nagur ia ka' koa tagal ia ka' koa sidi karas kapala man bai' pucaya' kade' Yesus dah mulakng idup biarpun dah dimadahi' disangahe urakng saksi mata. ¹⁵Lalu Yesus bakata ka' ia ka' koa, “Ampuslah ka' sigana ai' tanah man gesahatn Kabar Baik nang dari Allah ka' sigana talino. ¹⁶Sae nang pucaya' man dibaptis ia ka' koa disalamatatnna', tapi sae nang ina' pucaya' diukuma'. ¹⁷Tanda-tanda nian

nyarataia' urakng-urakng nang pucaya' ka' Aku, ia ka' koa ngoser setan-setan make dama-Ku, ia ka' koa ngomongnga' make bahasa-bahasa nang ina' suah dipalajari'. ¹⁸Kade' ia ka' koa nyingi'i' ular ato nyocok racutn, ia ka' koa ina' cilaka. Kade' ia ka' koa ngangkat kokot ka' urakng-urakng nang sakit, urakng-urakng ka' koa jaji samuh.”

¹⁹Laka' Yesus bakata lea koa ka' ia ka' koa, tarangkatlah Ia ka' saruga, lalu duduk ka' sabalah kanan Allah. ²⁰Ia ka' koa pun ampus ngesahatn Kabar Baik ka' sigana ai' tanah, man Tuhan Yesus nyaratai' ia ka' koa masing-masing man manjawat banyak kaajaipatn nang jaji bukti kade' kabar kasalamatan nang ia ka' koa ngesahatn koa sisi banar. Amin.]